

Jesocristopa Huanodsa itedsejemacca ima ahuato inanajaro

Apocalipsis

Jesocca dodosse Huano jadahi tocajadsapa dsama bedeni onini Patimo passo imenidsa huittidsacossajarodsa madijari. Aja Romanodenicca tamine Jesocristo tahimaridsa jipera tadsa Huano dama inadsa Patimohuaji dosse inajari. Nahi Patimohuaji madijaripa pina toponi cocorodsa huedsajari-ssa najari. Nahidsa madidsapa pina pocca huadassa nadsa Dio Corime itedsejemacca ima pohuadsa ahuato inanajaro. Nadsapa Huano pohua qqui tajaricca dsodo inajaro.

Ajjaro imapi Jesocristodsa jehe quinajaridenidsa dsodo inajaro. Motapa Romanodenicca nanajidso toquejenajari. Motapa tojicajari, mota tocassiejera-jarideni ajjaro ima mittamanadsapa poccadeni jeheniji todacorani nanijine pohuadenidsa dsodo inajaro. Ia naqui Romanodenicca nanajidso iquejena-jeraraha ajjaro ima imittadsapi icca jeheniji todacorani nanijine pajirani.

Ajjaro imapi Djotine Huanodsa ahuato inanajarocca imittani. Jeso ccanibote nadsapa ajjaro dsamadsa tojaridsa-ponijinecca ima dsodo inajaro. Dsama jicanicca naqui ima dsodo inajaro.

Huano qqui tajaripa bica tanicca, oppina tanicca, jidsa tanicca, ijabojo nanicca. Pohua qqui tajari huapimapi jidsa taraha ima deni tojanicca cajini.

Ajjaro imadsapi Jesodsa: Edede Bedi, najari. Pohuadsa nama najaripa tahide jodiodeni poccadeni imasiri manaconi edede bedi Diodsa da da quiquinanapojari. Jesopa huapimacca imasiri manaconi tojadsa pohuadsa: Edede Bedi, nanaja najari Dio.

Ajjaro imadsapi Diocca huadi Satanapa ajamani tojahi ahuato tajari. Jesona deni tojajari. Pohuana huapimacca tamine tojadsa memecca namicca dossede tojajari.

**Jesocristojine Huanodsa
jidapanacca ima ahuato,
nidsa dsotodecca ima
ahuato inanajaro**

1 ¹Diona Jesocristodsa itedsejemacca ima ahuato inanapojaro. Manaco Jesocristopa

pocca medsedenedidsa ahuato inananijine. Ajjaro ima iadsa ahuato inananijine Jesocristo pocca dodosse memehujicca dosse inaronadsapa ohuadsa huati tajari. Pohuajine qqui onajaro. Ohuapi Huano, Jesocristocca medse ojaní.
²Aji huapima ohua qqui onajaropi

pajissa huati onajaro. Aji dsodo onajaropi pajissa Dio Atti Jesocristojine ohuadsa ahuato inanajaro.

³Ajijaro ima Diojine ahuato tajarocca madija huapima mitta-manahijine hua hua najaripa huatidsehema madihitohui. Mitta-manajarideni naco aji dsodo naniccassa inanamanajarodeni naco huatidsehema madimana-hitohui. Diojine ahuato inanajaropi tohuajirajonani.

**Huanopa Jesocristodsa
quequeriquimana najari
7 najarodsa dsodo inajaro**

⁴Ohuapi Huano. Ajijaro occa imapi aji Asiahuajicca odsa panani 7 nanihuaji Jesocristo tahimari-dsa titiqueriquimana najarodeni-dsa dsodo onajaro. Diopa madihi. Nadsama madipojari. Nidsa cca-jonahitohui. Ccajonadsapa tiadenidsa ima bicani inanaridsana. Pocca jonehe inanaridsana, onajaro. Dio Pohua dosse dosse nanaja nahicca huihuittari tadsajanima Pohua Corime 7 quinaha domo huajarideni naco tiadenidsa ima bicani inanaridsamanana. Poccadeni jonehe tiadenidsa inanaridsamanana, onajaro. ⁵Jesocristo naco tiadenidsa najarossa inanaridsana, onajaro. Pohuapa Dio Atti nahato tadsa pajissara huati huati tajari. Pohuana tahide nahatonipojari. Pohuapa dsama huapimacca tamine deni tojajari. Huapimadsa dosse dosse najari. Jesocristo iadsa huati huana tajari. Imasiridsa imadiraha pohua emene toccajarojine icca imasiri inajicaridsajaro. ⁶Pohuajine pocca cacahuanijidsa iquejenajaro. Pohuajine pocca Abi Diodsa idsepe ijijaro.

*Diodsa dada toqqimade, huahuati toqqimade iquejenajaro. Nadsapi Jesocristodsa etetidse nana. ¡Pohuapa bica tahi, deni tojahi! Pocca nahatonaja huapima ecahuadsanaponijine pocca deni tojehe pajiranissa tajararo. Apaja pohuapa nama dsanapohuitohui, inana, onajaro. Pajissa nema nana.

⁷¡Ticattomama canaji!

Jesocristo meme essenima ccaronahi qqui tiquina-hitohui.

Madija huapima qqui toquina-hitohui.

Aja Jesocristo pohua nana-dsoqqededeni naco qqui toquinahitohui.

Dsama huapimacca madijapa pohuatohui oji oji quina-hitohui.

Jehe, pajissa nema nana.

⁸Ia Medsede Dio Attipa: –Ohuapi Dio Dacorabote. Tahidedsama omadipojaroa aji jicaquini bacco onanitohui –nade ia Medsede attipa. Pohuapa madihi. Nadsama madipojari. Nidsa ccajonahitohui.

Huanodsa Jesocristo ahuatojari

⁹Ohuapi Huano timecotedeni ojani. Titedsejedeni Diocca cacahuehedsa iquejenajaro. Madija Dio Attidsa jiperaquiri najaripa ia totonajidso-baqqumana najari. Naraha Jesocristojinepi ima inahananijine ipajirani.

Ohuapi passo nocconidsa dsama huittidsacossani Patimodsa ohua inebomanadsapi pina toponi cocorodsa ohuedsajarossa najaro. Dio Atti maride ojaridsadsa, Jesocristo tahimari ohuaccora-ridsadsapi Pohuadsa jiperaquiri najaridenijine

todsepe ojararo. ¹⁰Ia Medsedecca huada domingodsa Dio Corimecca dacorehe ohuadsa ahuatomadsa mohuini dacorehema ohuedehuaji omittajaro. Atti mohui pina jeihei mohui dacorajarissa nadsa omittajaro. ¹¹Atti ajama najari: –Ajijaro huapima tiadsa nohue onajaropi papeodsa dsodo taji. Aji dsama Asiahuajicca Jesocristodsa quequeriqquimana nahi 7 naridsajarodsa ima dosse tinaridsanijine. Odsa panani Epesohuaji, Esmirnahuaji, Peocamohuaji, Tiatirahuaji, Saradisiohuaji, Piradeopiahuaji, Laodiseahuaji dosse tinaridsaji –nade atti mohui tadsa. ¹²¿Nejecojari atti? onadsa piti onahuajanidsa qqui onanaja jojororo pinine dsibehi tajari orocca 7 quinaha qqui onajari. ¹³Qqui onanaja jojororo pinine cacahueri nahi nocconidsa pina madija bedissa naha hua canajari. Pocca etero dequerajaro amoridsa bacco tajaro. Pohua biji mete ssoosque dsibehi tajaro pina orossa najaro. ¹⁴Tati conepi nopo tajaro. Pina edede bedi nopohui conessa, pina ssono tetepinicca ssirini nophonissa najaro. Pohua noccopa pina dsippo jororonissa najaro. ¹⁵Pohua amori naqui dsibehi tajaro. Pina ccara tahicca onini *bronze dsippo ppoconidsa tojadarijaro, dsotode jiti nadsa todsibehijarossa najaro. Pohua atti dacorajaro, pina passo dacorehema ssahaha canajarossa najaro. ¹⁶Pohua dsepe nahatoniccadsa abadsico bedi 7 canaha cajijari. Pohua ajaridsapi jadsirecca massito cajadsirequimera najarossa najaro qquenajaro. Pano naco dsibehi tajari pina maji itetepidsa ssiejene dacorajarissa najari.

¹⁷Qqui onadsapa pina ohuatiajarossa najaro. Pohua amorihuaji ohuedimadsa oponajaro. Naraha pohua dsepe nahatoniccadsa ohua bara nadsa huati tajari: –Ticappinajeraji. Ohuapi tahidedsama omadipojaroa aji jicaquini bacco onanitohui –nade. ¹⁸–Ohuapi camitta onani. Odsoqueporaha onahatonidsapi omadidsanoponitohui. Ohuapi pipico ocajini. Najaripa dsoquemanapojarideni corime cacahuabaquihicca pipico –nade Jesocristo ohuadsa. ¹⁹Nadsapa ohua cadossejari: –Aji huapima qqui tinajarocca dsodo taji. Aji jidapana tojaridsajarocca dsodo, nidsa dsotode tojanijinecca dsodo taji. ²⁰Aja abadsico bedi 7 canaha odsepe nahatoniccadsa qqui tinajari, jojororo pinine orocca 7 naha qqui tinajaricca ima ahuatora taraha imapi ajima najaro: Aja abadsico bedi 7 canajaripa *otahimaridsa quequeriqquimana najari 7 najaro cacahuade toquejenajaridenicca ima. Aja jojororo pinine 7 najari naco otahimaridsa quequeriqquimana najari 7 najaro –nade Jeso ohuadsa.

**Odsa panani Epesocca
Jesocristodsa
quequeriqquimana
najaridenidsa Jesocristo
pohua atti dosse inajaro**

2 ¹Jesocristo ohuadsa huati dsanapojari: –Epesohuaji otahimaridsa quequeriqquimana najari cacahuadedsa dsodo taji –nade. –Ohuapi odsepe nahatoniccadsa abadsico bedi 7 canaha ocajijaro. Jojororo pinine orocca 7 naha cacahueri naridsajari qquide

naqui occaridsajaro, nahi taji, onajaro. ²Ticcadeni madie ohuadsa ahuato taridsajaro. Dio tiadeni tocadossebaquijaridsa tidsepedeni ijimanadsapi dacoco tijiradsa tidsepedeni ijimanajaro. Otahimari dsara disseraqqiri tiquinajaro. Ticcadeni ima onihi naqui nahato onani. Najaropi tabaccorehe inamanajarodeni tettajo-baqquimanajari. Madija mota maidsamanadsa attidenipa: “Iapi Jesocristocca dodosse tabaqqi iquejenani” quinaraha poccadeni ima nattome tiquinadsapi tijinedeni poccadeni maidsehe ahuato tinanamana-jaro. ³Otahimari tinebomananjine madija tiadeni tonajidsobaqquimanaraha tinebomana-jerani. Ticcadeni ima occa marinajassa nanijine jahohoraqqiri tiquinajaro-paji.

⁴ –Naraha ticcadeni ima motapi jipera onani. Tahidepi ohuadsa tetideni huanacquiri nadsa ohuadsa tetidsemaneri naporaha dsotodepi ticcadeni huatidsehe ajimani tojani. ⁵Tibodideni huatoma-manaji. Aji ohuadsa tetidsemanapojarocca ima tetideni ajimamana tejeraji. Tibodideni cacajiquimera-pomaji. Ohuadsa tetideni huanaqqiri napomaji. Nema tiquinejeradsapi nanihuaji occadsa ticcadeni jojororo pinine odinihitohui. ⁶Naraha ticcadeni ima onihipi bica tani. Nicolaitadenicca ima tabaccora taniccadsa jiperaqqiri tiquinani. Ohua naqui Nicolaitadenicca imadsa jipera onani.

⁷ –Dio Corimepa otahimaridsa quequeriquimana najaridenidsa huati huati tajari. Aji huapima titiqueriquiridsa nanihuaji

teribodeni ticajimanadsapi Pohua Atti timittamananissa taji, onajaro. Aji occa dacorehema timadimanadsa ohuadsa jehe tiquinajaro tinebomana-jeradsapi nidsa Diocca *dsama bicanihuaji ahuabono camittehecca tijipamananijine tiadenidsa da onaridsahitohui –nade Jeso.

**Odsa panani Esmirnacca
Jesocristodsa
quequeriquimana
najaridenidsa Jesocristo
pohua atti dosse inajaro**

⁸Jesocristo ohuadsa huati dsanapojari: –Esmirnahuai otahimaridsa quequeriquimana najari cacahuadedsa dsodo taji –nade. –Ohuapi tahidedsama omadipojaroa aji jicaqqini bacco onani-tohui. Odsocqueraha onahatonidsapi omadijaro. ⁹Aji ohuapi nemanene nahato onani. Najidsohuedsa timadimanani nahato onani. Todsepetaji ticappiramanene timadimanajaro naqui nahato onani. Naraha pajissa tiadenipi Diocca daniji bicabote onihi onihi nehe ticajimanani. Tiadenidsa jiperaqqiri najarideni tiadeni tototamasso-baqquimana najari nahato onani. Najarideni attidenipa: “Iapi jodiodeni, Diocca madija iquejenajaro” quiquinana-raha najaropi pajissa jerani. Ima pajissapi pohnadenipa Satanacca medse toquejenajari. ¹⁰Nidsa otahimari acconi ocasserani temandsapi ticappinamana tejerana. Satanajine tiadeni mota pamahapa toponi cocorodsa toquejenahitohui. Nama nahijinepa tiadeni huapima tiadeni nattome tabaqquihitohui. Huada 10 nehe pohnajine ocasserani

temanaraha otahimaripi tinebomana tejeraji. Disseraquiri tidsanapomanaji. Otahimari tinebomana-jeradsa tidsoqqueமானანი bacco tiquina-dsapi tiadenidsa occa camittehe jiquejeranicca da onanitohui.

¹¹ –Dio Corimepa otahimaridsa quequeriqqumana najaridenidsa huati huati tajari. Aji huapima titiqueriquiridsa nanihuaji teribodeni ticajimanadsapi Pohua Atti timittamananissa taji, onajaro. Aji occa dacorehema timadimanadsa ohuadsa jehe tiquinajaro tinebomana-jeradsapi tidsoqqueமானနာဟာ *dsoquehe dsotodeccapi tinahanamana-jeranitohui, onajaro –nade Jeso.

**Odsa panani Peocamocca
Jesocristodsa
quequeriqqumana
najaridenidsa Jesocristo
pohua atti dosse inajaro**

¹² Jesocristo ohuadsa huati dsanapojari: –Peocamohuaji otahimaridsa quequeriqqumana najari cacahuadedsa dsodo taji –nade. –Ohuapi jadsirecca massito cajadsireqqumera najaro ocajini. ¹³ Aji ohuapi ticcadeni madie nemaneha nahato onani. Timadimananihuajipi Satanacca ima dacoraraha ohua onipi tinebomana-jerajaro. Ohuadsa jehe nahissa tajari oni Antipas tinoridenidsa inanadsoqqe-மானနာဟာ ohuadsa jehe tiquinajaropi tinebomana-jerani. Nahi tiadenihuajipa Satana dosse dosse naraha ohua tinebomana-jerani.

¹⁴ –Naraha ticcadeni ima motapi jipera onani. Tiadenihuaji madija motapa maittaccadsama madijari

Baramicca marinaja nebomanajarahi. Aja Baramipa Isaraerideni imasiri inanamanihijine dsama Moabacca tamine Baraca inahattajari. Pocca marinajapi ajima napojaro: Siba nahatonidsa da tahicca bani Isaraerideni jipamanahijine oppinera tani. Huananehe inanamanihijine naqui oppinera tani, najari.

¹⁵ –Nahidsa naco madija mota Nicolaitadenicca marinaja nebomanahijine jiperaquiri najari. ¹⁶ Tibodideni tecajiquimeraji, najaro ima pamehe tiadenidsa nohueranihijine. Ticcadeni ima tecajiquimera-jeradsapi tiadenihuaji occanitohui. Baramicca, Nicolaitacca marinaja cajimanajarideni ocahadi-baqquihitohui. Ohuajaridsa ohuatti qqenajaro pina jadsirecca massitossa najaro pohuadenidsa ssonarinitohui.

¹⁷ –Dio Corimepa otahimaridsa quequeriqqumana najaridenidsa huati huati tajari. Aji huapima titiqueriquiridsa nanihuaji teribodeni ticajimanadsapi Pohua Atti timittamananissa taji, onajaro. Aji occa dacorehema timadimanadsa ohuadsa jehe tiquinajaro tinebomana-jeradsapi tiadenidsa pan oni *mana memehuaji tonajimahicca tijipamananihijine da onaridsahitohui. Siba noponi naqui tiadenidsa da onaridsanitohui. Najaro sibadsapi tiadeni oni dsati dsodo nani cajiridsani. Najaro tiadeni onipi tiadenira nahatoqquri tiquinajaro –nade Jeso.

**Odsa panani Tiatiracca
Jesocristodsa
quequeriqqumana
najaridenidsa Jesocristo
pohua atti dosse inajaro**

¹⁸ Jesocristo ohuadsa huati dsanapojari: –Tiatirahuaji

otahimaridsa quequeriquimana najari cacahuadsa dsodo taji –nade. –Ohuapi Dio Bedi ojani. Onoccopi pina dsippo jororonissa najaro. Ohuamori naqui dsibehi tajaro. Pina ccarara onini bronce jiti nani todsibehijarossa najaro. ¹⁹Ima huapima tinanamanajaro naqui nahato onani. Otohui tetideni huanaquiri nadsa ohuadsa tetidsemanani nahato onani. Ticcadeni jeheniji dadorani nahato onani. Ohuadsa tidsepedeni ihijimana najaro. Najo tanicadsa iboraquiri tiquinani nahato onani. Jidapapi denima nema tidsanapomanani naqui nahato onani.

²⁰ –Naraha ticcadeni ima motapi jipera onani. Najaropi amoneje Jesabeocca ima. Poni attinipi: “Ohuapi *Dio Atti cacomerabote” naraha maidsajaro. Ponicca mari-najajine occa madija huananehe-dsa toquejenaridsajari. Ponijine siba nahatonidsa da tahicca bani naco jijipamana najari. ²¹Ohuapi poni bodini cacajiquimeranijine tohuini omadi omadi dsanaporaha bodini cacajiquimeranijinepi jipera tajaro. Ponicca huananehe nebonijine jipera tajaro. ²²⁻²³Naraha jidapapi ojine coma tehe porinitohui. Ponicca ejedeni naco onajicahitohui. Nidsa poni ajadedeni naco bodideni cacajiquimera-jaradsa, poccadeni imasiri nebomana-jaradsapa pahuadeni naco comaquiri nadsa ocasserani ahuamanahitohui. Nadsama otahimaridsa quequeriquimana najari huapima bodideni huatoma-manadsapa occa ima nahatoquiri nahijine. Ohuapi madija attideni nahato, bodidenicca ima nahato onajaro. Imasiri

tinanamanajaro manaconi tiadenidsa onananitohui.

²⁴ –Naraha Tiatirahuajicca tiadeni mota aji Jesabeocca mari-najadsa tiquejena-jeradsapi, aja “Satanacca marinaja deni tojanicca ahuatora tani” quiquinanajaridsa tiquejena-jeradsa naqui tiadenidsa ima oppina tanicca huati onejeraraha ima ojariena huati onajaro. ²⁵Ticcadeni ima bicani tecahuamanadsanapona, occanipomanihuaji bacco tiquinanijine. ²⁶Aji occa dacorehema timadimanadsa, ohuadsa jehe tiquinajaro tinebomana-jeradsa naqui, aji ohua jipa onanica tidsepedeni ijimanadsapi nema tidsanapomanajararo occanini bacco tiquinanitohui. Nadsapi dsama onihi onihi naridsajarocca madija dossede tiquejenanijine tiadenidsa dacorehe onananitohui. ²⁷Maittaccadsama occa Abipa ohuadsa: “Dsama nemanehedsa madiridsamanajaridenicca tamine tijanitohui. Pina tamine dacorabote pocca dsodsojo ccanajabotedsa dsipa idadsa bararijarossa tinanabaquihitohui” napode ohuadsa. ²⁸Naraha cacahuehe najarossa najaro tiadenidsa naqui onanaridsadsapi dsama huapima tecahuaridsa-mananitohui. Tiaidenidsa ima onihi bica tanicca naqui onanaridsanitohui. Madija huapima ticcadeni deni tojehe qqitoquinahitohui. Pina ssiajajonanicca abadsico bedi ssiejene dacorajarissa tiquinanitohui.

²⁹ –Dio Corimepa otahimaridsa quequeriquimana najaridenidsa huati huati tajari. Aji huapima titiqueriquiridsa nanihuaji teribodeni ticajimanadsapi Pohua Atti timittamananissa taji –nade Jeso.

**Odsa panani Saradisiocca
Jesocristodsa
quequeriquimana
najaridenidsa Jesocristo
pohua atti dosse inajaro**

3¹ Jesocristo ohuadsa huati dsanapojari: –Saradisiohuaji otahimaridsa quequeriquimana najari cacahuadsa dsodo taji –nade. –Aji ohuapi Dio Corime 7 naha ocaji, abadsico bedi 7 canaha ocaji najaro. Ohuatti tiadenidsa ajima onajaro: Ticcadeni ima huapima nahato onani. Madija ohuahadani ticcadeni madie qqui toquinadsa attidenipa: “Jesocristo tahimaridsa huahuatidsemana nahi” quinaraha ohuapi pajissa nahato onani: Ohuadsa tetideni ajimamanabote nani. Pina tecotajarossa najaro. ² ¡Jari, tinoccodeni ssire-re napomaji! Titiqueriqui nanicca ima jicabote nani. Tidacora-manani napomaji. Ticcadeni madiecca ima nahato onani: Occa Abi Diodsa tidsepedeni ijjaropi tijinedeni toccanissa tejerani.

³ –Nadsama tiadenipi tibodideni huatoma-mananissa taji. Aji occa marinaja tiadeni mari tocana-baqquipojarissa tinamanapomaji. Ticcadeni ima tecajiquimera-manapomadsa Diodsa tiquejenanipomaji. Nema tiquinejeradsapi tiadeni onajidsobaqqunitohui. Pina tetideni ajimama canaraha tiadenidsa bobotide bacco dsimajarissa onanitohui, onajaro.

⁴ –Naraha tiadeni Saradisiodsa titiqueriqui najaro motadeni ajijaro dsamacca imasiridsa toquejenanipoma-jarahi. Poccadeni imapi pina poccadeni etero tohoba-jerajarossa

najaro. Nidsa ohuadsa madimanasapa pohuadenidsa etero noponi da onaridsanitohui. Bicaquqiri najarijine ohuadsa etero noponidsa jahiridsahitohui. ⁵ Occa dacorehema timadimanadsa imasiridsa deni tiquejenadsapi nidsa dsotode etero noponi tedsaridsamananitohui. Diocca papeo *camittehe cajimanasanapohuijineccadsa tiadeni oni dsodo nani sse onaridsa-jeranitohui. Nidsa occa Abi pocca dodosse tabaqquideni tedseje baccodenihuaji tidomo huadsa: “Ajajaridenipa occa madija” onanitohui.

⁶ –Dio Corimepa otahimaridsa quequeriquimana najaridenidsa huati huati tajari. Aji huapima titiqueriquiridsa nanihuaji teribodeni ticajimanadsapi Pohua Atti timittamananissa taji –nade Jeso.

**Odsa panani Piradeopiacca
Jesocristodsa
quequeriquimana
najaridenidsa Jesocristo
pohua atti dosse inajaro**

⁷ Jesocristo ohuadsa huati dsanapojari: –Piradeopiahuaji otahimaridsa quequeriquimana najari cacahuadsa dsodo taji –nade. –Ohuapi pajissa. Obodi ssiaja, huire tajaro. Maittaccadsamacca tamine Dabicca pipico ocajini. Najari pipicodsa Jerosare dsaticca noccobiji ohuacahuajaro. Madija Diodsa memehuaji madimanahijine jehe onadsapi jai tojedsimahitohui. Jehe onejeradsapi jai tojedsima-jarahitohui.

⁸ Ohuapi aji huapima tidsepedeni ijiridsamanajarocca nahato onani. Nidsa Dio madihihuaji tiadenidsa: “Jai tijedsimaji” onanitohui.

Nanihuajicca noccobiji tiadeni-dsapi tohuabani. Madija ohuaha ecossanjine ssamo tani. Tiadenipi dacoco tijira-jeraraha ohuattidsa iboraquiri tiquinani. Madijajine nanajidso tiquejenadsa naqui ohua oni tinebomana-gerani.

⁹ –Titohuideni ohuati huana tani. Nidsa mamaisadedeni ojine tibaccodenuhaji pohnadeni pitodsa jassi tahitohui. Nama onanabaquidsapa tiadenidsa ohuati huana tani pohnadenidsa ahuato tanitohui. Najari jodiideni mota attidenipa: “Tapi jodiideni, Diocca madija iquejenajaro” quiquinanaraha pajissapa Diocca huadi Satanacca medse toquejenajari.

¹⁰ –Tiadenidsa huati onapojaropi: “Ocasserani temanaraha mohuara-dsa tinahanamanana” onapode. Nadsama ohuatti tecahuamananissa tadsa aja dsama huapimacca madija ima ocassera taniccadsa nattome onabaquidsapa tiadeni dsori onanabaquinitohui. ¹¹ Occanibote nani. Ticcadeni ima bicanipi tecahuamananissa taji. Ohuadsa diseraquiri tiquinadsapi Diocca daniji bicani ticajimananitohui. Paji, ticcadeni jeheniji madija inassamanarana. Diocca daniji pohnadenijine dsori ticanirerana. ¹² Occa dacorehema timadimanadsa, imasiridsa deni tiquejenadsapi nidsa dsotode occa Abi Dio madihihuaji timadimananitohui. Ojine tiadenipi pina memehujicca Pohnuadsa dada toquimacca odsa pininissa tiquinanijine. Nanidsapi jai tijena-jeranitohui. Occa Abi Dio oni tiadenidsa dsodo, Pohna madihihuajicca odsapanani onini naqui dsodo onaridsanitohui. Najaro odsapanani oninipi

*Jerosare dsati. Najaropi occa Abi Djojine memehujicca nanihuaji bacco naronanitohui. Ohua oni dsati naqui tiadenidsa dsodo onaridsanitohui.

¹³ –Dio Corimepa otahimaridsa quequeriquimana najaridenidsa huati huati tajari. Aji huapima titiqueriquiridsa nanihuaji teribodeni ticajimanadsapi Pohna Atti timittamananissa taji –nade Jeso.

**Odsa panani Laodiseacca
Jesocristodsa
quequeriquimana
najaridenidsa Jesocristo
pohna atti dosse inajaro**

¹⁴ Jesocristo ohuadsa huati dsanapojari: –Laodiseahuaji otahimaridsa quequeriquimana najari cacahuadedsa dsodo taji –nade. –Ohuapi pajissa. Aji huati huati onajaropi pajissa qqui onajaro imara huati huati ohonanajaro. Huapima Abi Dio inahatoridsajaripa ojine tojaridsajari. Nadsama ohuatti tiadenidsa ajima onajaro: ¹⁵ Ticcadeni ima huapima tinamanajaro nahato onani. Ohuadsa jehe tiquinajaropi tinebomana-jeraraha ohuadsa tetidsemana-gerani naqui nahato onani. Jaho, ohuadsara tetidsemaneri naccaraho. Tiadenipi pina bani ppejene ppocora-jarajarissa, pina passo nahui tejerajarossa tiquinajaro. Nema naniccapi dse nanijine ocassera tajaro. ¹⁶ Pina passo nahui tejerajarossa tiquinajaropi tiadeni capiri onanitohui. Ticcadeni ima ocassera tadsapi tiadeni ohuattajo-baqqunitohui. ¹⁷ Naraha tettidenipi: “Iapi ima bicani ssequiri inani. Ijine icca ima toccanissa tani. Icappira-gerani”

titiquina naraha tibodideni huatonissa tejerani. Ima pajissapi ssamoqquri tiquinani. Ticcadeni imapi bica tejerani. Tohuati nahanaqquri tiquinani. Ticappiramananissa tajaro. Pina madija nocco siri-sa tiquinajaro. Pina etero jiraha ccorojedeni madimanajarissa tiquinajaro.

¹⁸ –Nadsapi tibodideni acco ocamabaqqinijine tiadenidsa huati onana: Aji ohua ocajjarocca mita tiquinaji. Nadsana ima bicani ticajimananjine. Najaroa ima bicanipi pina oro dsippo pporacada todsibehidsapi huatini ccara tanicassa najaro. Aji ticcorojedeni noppineni ticappinamandsapi etero noptoni ocajjaro mita tiquinaji. Najaro tedsamanadsapi ticcorojedeni ahuato tejeranjine. Aja tonococca jemedsi ocajjaro naco mita tiquinajo, tinoccodeni sse tiquinadsapi tinoccodeni ssire taridsanjine, onajaro.

¹⁹ –Ohuapi madijadsa ohuati huana tadsa imasiri inamanadsapi ohuatti dacorehema pohuadenidsa: “Nema tiquinejeraji” ohonanajaro. Poccadeni ima tobicanijine naqui mari mari onajaro. Ohuadsara tetidsemanaji. Ohuadsara disseraqquri tiquinaji. Tibodideni cacajiquimeradsa Diosda tiquejenanipomaji. ²⁰ Ohuapi noccobijidsa huahua onajaro. Madija ohuatti mittadsa noccobiji icatabojidsadsapi pohuadsa oqquedsimanitohui. Oqquedsimadsapi pohua tedseje ijpanitohui. Pohua naco ohuadsama jipahitohui. ²¹ Ohuapi imasiridsa deni ojajarojine occa Abi dosse dosse nahihuaji ohuittarijaro. Tiadeni



naqui imasiridsa deni tiquejenadsapi nidsa dsotode ohua dosse dosse onanihuaji tiadenidsa: “Jassitinariji” onanitohui.

²² –Dio Corimepa otahimaridsa quequeriquimana najaridenidsa huati huati tajari. Aji huapima titiqueriquiridsa nanihuaji teribodeni ticajimanadsapi Pohua Atti timittamananissa taji –nade Jeso.

Memehuaji Diosda huatidsemanajari

4 ¹ Aja Jesocristo pohuadsa quequeriquimana najaridenidsa ima huati tahi jicani nattinipi qqui onaneje memehuaji pina noccobiji tohuabajarossa nehe qqui onajaro. Atti naco dacorajari pina jeihei mohui omittapojarossa najaro omittapomajaro. Nadsapa ohuadsa huati tajari: –Ahuaji ticmacossaji. Jidacca qqui tinajaro

nattini dsotode tojanijinecca ima tiadsa nohue onana –nade.

²Nadsapi Dio Corimecca nahato-hue ohuadsa ssonaridsa qqui onaneje meme Dio dsamarihuaji deni tojahicca huihuittari bicabote qqui ocanajaro. Najaro huihuittaridsa huittari canahi qqui onajari. ³Aja huittarijaripa ohuadsa ahuato tajari. Pohuapa dsibehi tajari. Dsibehine pina siba huatini ccara tanicca dsibehinissa najari. Pina diamante dsibehinissa, pina robi dsibehinissa najari. Pohua huittarihi tetepidsa naqui meme janoni porimacossani qqui onajaro. Janonipi pina siba esemeraoda dsibehinissa najaro. ⁴Pohua huittarihihuaji qqui onadsapi cacahuadedeni 24 quinaha jassi tariridsajari. Dodossededenicca huihuittari bicaqquiri najaro-dsa jassi nahuajanijari. Poccadeni etero nopoqquiri najaro. Pohuadeni tatidsa tamine taticca oro nahatoni huittariridsajaro. ⁵Pohua huittarihidsa sssiede ssiehe canajaro, ttotorode ttororo canajaro. Mohuini onihi naqui qquenaridsajaro. Pocca huihuittari bicabote tadsajanima jojororo 7 naha jororo canaridsajari. Najari jojororopa Dio Corime ahuatoridsajari. ⁶Nani pocca huihuittari bicabote tadsajanimapi pina coridsa imenissa naraha ccara tajaro. Tocassiejeqqi-mera najaro, pina siba cristaossa najaro.

Nahi Pohua huittarihi inoridsa naco camittaquiri najarideni 4 quinaha huahueri nahuajanijari. Pohua baccohuaji, pohua idehuaji, pohua ppari nahatonihuaji, pohua ppari ssamohuaji naridsamanajari.

Camittehe cajimanajari assiredenidsapi noccodeni ijrirdsajaro. Pohuadeni tedsejema qquide nahatoqquri, pohuadeni nattihuaji qquide nahatoqquri najari. ⁷Najarideni ojaria tahideccapa pina dsomaji. Ohuahapa pina bohui. Ohuahapa pina madija pano. Ohuahapa pina ssibiri imehibote meme tocajari-ssa najari. ⁸Aja 4 quinajaridenipa eppedeni 6 naha cajiridsamanajari. Assiredenidsa noccodeni ijrirdsajaro. Eppedeni bodihuaji naqui noccodeni ijrirdsajaro. Nadsama pohuadenipa ssiajama jijiri, dsomema jijiri dsadsanapomana najari. Pohuadeni attipa:

–Ia Medsede Diopa bicabote. Bodi ssiaja tahi, huire tahi ojarihi.

Pohuana dacorabote ojarihi. Pohuapa nadsama madipojari. Madihipaja nahi. Nidsa ccajonahitohui –quiquinanajari.

⁹Aja deni tojahicca huihuittari bicabotedsa huittari canajaripa madidsanapojari. Najaridsa camittehe cajimanajaridenipa huati toquinajari: –Ticca nahatohue deni tojani, tiadsa etidsejaro, iadsa tijine bica tani, inajaro –quiquinanajari.

¹⁰Najaro huati huati totoquina nadsapa cacahuadedeni 24 quinajari aja Madidsanapojari tedsejema pohuadeni pitodsa jassi tadsa Pohuadsa huatidsemanajari. Pohuadsa huatidsemanadsa pohuadeni taticca oro nahatoni pohua huittarihi tedsejema hua inaqquimanajari. Nadsapa attideni ajama quinajari:

¹¹ –Ia Medsede icca Dio, Tiadsa etidseni bica tani.

Tiana dsama huapimadsa caji-
ridsajaripa tinahatoridsajari.
Tia tohuini tadsa tijine huapima
nahatoridsajari.
Najarojine madija huapima
tiadsa: “Bica tinani, deni
tijani” quinahijine bica tani,
inajaro –quinade.

**Edede Bedi papeo pico
naqquni idijaro**

5¹Nadsapa deni tojahicca
huihuittari bicabotedsa huittari
canahihuaji qqui onaneje pohua
dsepe nahatoniccadsa papeo pico
naqquni dsojo tojidsajari. Bodihuaji
dsodo, huapihuaji dsodo najaro.
Nepi tamaroni 7 nehe cajijaro. ²Dio-
cca dodosse dacorabote ojaría qqui
onajari. Pohua atti mohui tadsa huati
tajari: –¿Nejecojarina ima jjiirade
bicabote deni tojajari? Najarina papeo
pico naqquni nepi nacossaridsani
ssoja ijidsadsa inahabanijine bica tahi
–nahi omittade. ³Naraha aja meme-
huajicca, namihuajicca, nami bodi-
huajicca naco papeo pico naqquni
inhabamananijine huapima pajira-
manaja cama-jarahi. Bodicca ima
qqui quinanijine naqui pajiramanaja
cama-jarahi. ⁴Nadsapi oji oji onade.
Jaho, madija ima jjiirade bicabote
deni tojajari papeo pico naqquni
inhabanijine nohuerahi. Qquide naco
pajiramanaja cama-jarahi, onade.
⁵Naraha nahihuaji cacahuadedeni
jassi nahuajanijari 24 quinajari ojaría
ohuadsa huati tajari: –Oji tejeraji, aja
Isaraeri bedi Joda potemahi dacorehe
cajijari pina dsomajissa najari. Najaripa
Isaraeridenicca tamine Dabi Potemahi.
Pohuana dsoqquehedsa deni tojajari.
Papeo pico naqquni inahabanijine
pajirahi. Pohuana nepi nacossanicca

7 nehe ssoja ijidsaridsanijine bica
tahi –nade ohuadsa. ⁶Nadsapa deni
tojahicca huihuittari bicabotedsa
huittari canahihuaji qqui onanaja
*Edede Bedi Jeso pina inanadsoqqe-
manapojarissa naraha hua canajari.
Pohuapa camittehe cajimanajarideni
4 quinajari, cacahuade 24 quinajari
domodeni huahi nocconidsa huajari.
Aja ori 7, nocco 7 najaripa Dio Corime
7 naha dsama huapimadsa qquide
jahiridsahijine Dio dosse inabaqqui-
jari. ⁷Nadsapa Edede Bedipa papeo
pico naqquni idinijine deni tojahicca
huihuittari bicabotehuaji toccajari.
Nahidsa huittaritari dsepe nahatoni-
ccadsa papeo dsojo ijidsajaro idijaro.
⁸Najaro papeo ididsapi camittehe caji-
manajarideni 4 quinajari, cacahuade-
deni 24 quinajari tedseje Edede Bedi
pohua tocattahihuaji pohuadeni pito-
dsa jassi tajari. Pohuadenipa titire oni
arpa cajimanajari. Pohuadeni dsepedsa
tasao oro nahatoni bodidsa *nahatohui
majo bicabote caji naha dsojo dsojo
tojidsamaneri najari. Majo bicabote
tohuessidsa jami-mi canajaripa Diocca
madija Pohuadsa huati huati totoquina
nahicca ima. ⁹Pohuadenipa ajie dsati
jiri icanamanadsapi ajama quinajari:
–Tiana bicabote deni tijani
ojari tajaro. Papeo pico
naqquni tidijaro bica tani.
Nepi tamaroni 7 nehe cajiraha
ssoja tijidsanijine bica tani.
Tiana tia inanadsoqqe-
manadsa temene toccajarodsa
Diodsa toquejenahijine mitta
tinabaqqujaride.
Aja madija dsama onihi
onihidsa madiridsamana-
jarideni mota, tohuatti onihi
onihi cajiridsamanajarideni
mota, huapideni onihi onihi

cajiridsamanajarideni mota
tijine Diodsa toquejenaridsa-
jari.

¹⁰ Tijinepi Abi Diocca cacahueheda
tamine toquejenaridsajari.

Tijinea Abi Diodsa dsepedeni
ihijimana najari. Pohuadsa
huahuati toqqumade toque-
jena, dada toqqumade toque-
jena najari. Pohuadsa jiri jiri
quiquinanajaripaja.

Aji namihuaji madimanajari-
deni huapima dosse toque-
jenaridsahitohui –quinade,
jiri jiri quinadsa.

¹¹ Nadsapi qqui onaneje deni
tojahicca huihuittari bicabote
cahittarinihuaji Diocca dodosse
tabaqqi memehuajicca huapima
attideni omittajaro. Nahi huihuittari
cahittarinihuajipi camittehe caji-
manajarideni domo huahuajani, caca-
huadedeni naco domo huahuajani
nahi idedenihuaji Diocca dodosse
tabaqqi qqui onabaqquiraha siba
tahi. ¹² Najaridenipa jiri jiri quinadsa
attideni mohui taha ajama quinajari:

–Edede Bedi dsoqquepojaripa
deni tojjari.

Pohuana huapimadsa dosse
dosse nahi pajirahi, bica tahi.
Dsama huapimacca biquehe
pohuadsa tojanijine bica tani.
Pohuana bodi nahato tahi
ojari nahi.

Pocca dacorehe deni tojani
bica tani.

Huapima attidenipa: “Tiana
icca Tamine deni tojahicca.
Ticca deni tojehe nema
dsanapona” quinana, inajaro.
Pohuadsa etidsedsa: Tiana bica
tinani, deni tijani, inanijine
bica tani –quinade.

¹³ Nadsapa Diocca nahatonaja
huapima attideni omittajaro.
Memehuajicca, namihuajicca, nami
bodihuajicca, passo imenicca jiri jiri
quinadsa ajama quinajari:

–Deni tojahicca huihuittari
bicabotedsa huittari cana-
jaridsa,

Edede Bedi pohuadsa naco
etidsejaro.

Pohuadenidsa etidsedsa:
Tiazenina icca Tamine
deni tiquejenanicca.

Ticcadeni deni tojehe nema
dsanapona, inajaro.

Ticcadeni dacorehe deni tojani,
bica tani, inajaro.

Najaro ima bicani nemanehipi
tiazenidsa nema dsanapo-
nitohui, inajaro –quinade.

¹⁴ Nadsapa camittehe cajimana-
jarideni attidenipa: –¡Pajissa
nema nana! –quinade. Nadsapa
cacahuade 24 quinajarideni pohua-
deni pitodsa jassi tadsa deni
tojahicca huihuittari bicabotedsa
huittari canajaridsa huatidsemana-
jari. Edede Bedidsa naco huatidse-
manajari.

Papeo pico naquini nepi tamaroni 7 najaro

6 ¹ Ocattoma cananeje papeo
pico naquini nepi tamaroni
7 najaro tahidecca Edede Bedi
ssoja ijdساني qqui onade. Nadsapa
camittehe cajimanajarideni 4
quinajari ojaria jadsirema huahua
nahi omittade. Pohua atti mohuini
pina ttottorode mohuinissa nadsa:
–Nija, ahuaji ticcajonaji –najari.
² Nadsapa bojo nopohui qquenahi
qqui onajari. Najari idedsa huittari-
jaripa ssissite caji nade. Nadsapa

tamine taticca pohuadsa da quina-
dsa toccajari, jadsiredsa deni
tojaridsahijine.

³Nadsapa papeo nepi tamaroni
dsotodecca Edede Bedi ssoja
ijidsajaro. Nanaja camittehe caji-
manajarideni ohuaha huahua nahi
omittade: –Nija, ahuaji ticcajonaji
–najari. ⁴Nadsapa bojo ohuaha
macco tajari qquenajari. Najari bojo
idedsa huittarijaridsa dacorehe da
inajaro, dsama huapimadsa jonehe
inajcaridsanijine. Pohuajine madija
jadsire inanamanadsa ahuaji tojica,
ahuaji tojica naridsamanahijine.
Pohuadsa jadsirejine massito imeni-
bote naqui da icanade.

⁵Nadsapa papeo nepi tamaroni
onihi 3'cca Edede Bedi ssoja ijidsa-
jaro. Nanaja camittehe cajimana-
jarideni ohuaha huahua nahi
omittade: –Nija, ahuaji ticcajonaji
–najari. Nanaja bojo sohuehi
qquenahi qqui onajari. Najari
bojodsa huittarijaripa ccanajani
nanattome cajide. ⁶Camittehe caji-
manajarideni domo huahi nocconi-
dsa tohuatti mohuini omittajaropi
ajima najaro: –Huada ojarinicca
tarabadsa manaconipi aroso jidsa-
dsa trigo kilo ojaria pajirahitohui.
Najarossa najaro huada ojarini-
cca tarabadsa manaconipi aroso
jidsadsa cebada kilo 3 naha pajira-
hitohui. Naraha ahua bono oribo
oquine, uva ppejene naco huati
ccara tadsapa pohuama sso tiquina
tajarana –nade.

⁷Nadsapa papeo nepi tamaroni
onihi 4'cca Edede Bedi ssoja ijidsa-
jaro. Nanaja camittehe cajimana-
jarideni ohuaha huahua nahi
omittade: –Nija, ahuaji ticcajonaji
–najari. ⁸Nanaja bojo huessehi

qquenahi qqui onajari. Idedsa
huittarijari onipa Dsoqqeue. Pohua
nattihuaji ohuaha ccajonajaripa
dsoqqemana-pojarideni corime
cacahuade. Najarideni pamaha-
dsa dacorehe da quinajaro. Madija
dsama nemanehedsa madimana-
jarideni mota inajidso-baqqumana-
hijine. (Najari mota caria attidsapi:
cuarta parte, quinajari.) Jica-
hijinepa jadsiredsa tojica, pemidsa
tojica, dsamacomadsa tojica, bani
huadi tajarijine tojica nahitohui.

⁹Nadsapa papeo nepi tamaroni
onihi 5'cca Edede Bedi ssoja ijidsa-
jaro. Nanaja Diodsa da tahijinecca
huahuanari dopanidsa jicapojar
corimedeni qqui onabaqquide.
Najaridenipa Dio Attidsa dissera-
qquiri najari, aja Jesocristo tahi-
mari huati huati nanaridsamana
najarijine tojicajari. ¹⁰Nadsapa
attideni mohui tadsa huati toquina-
jari: –Ia Medsede Dio, Tiana deni
tijani. Tibodipi ssiaja, huire tani.
Tia huati tinadsapi Tetti pajirani-
ssa tinananitohui. ¿Nejecoma nadsa
namihuaji madiridsa-manajarideni-
cca ima ticattemanijine? ¿Nejecoma
nadsa emene toccajaro manaconi
ia nanadsoqqededeni tinajidso-
baqquihijine? –quinade. ¹¹Nadsapa
etero noponi huedsamanahijine
pohuadenidsa da inaridsajaro.
Pohua Attipa: –Jassi tiquina-
ccaji. Timecotedeni pina tiadenissa
quinajari Jesocristocca dossenijidsa
dsepedeni ijimanaccajari. Nidsa
pina tiadeni tijicapojarossa quina-
ccahitohui. Najaridenitohui badsira
tehe timadimanaccaji –nade Dio.

¹²Nadsapa papeo nepi tamaroni
onihi 6'cca Edede Bedi ssoja ijidsa-
jaro. Ocattoma cananeje dsama

nemanehe dsadsa najaro. Majipa todsidsijari. Pina *etero sohueni madija dsoqqehitohui oji quina-dsa huedsamanajarissa najaro. Abadsico naco tocamacajari, pina tohuemenessa canade. ¹³Meme-huajicca abadsico bedi naco nami-huaji catojaridsajari. Pina ahua iquiera bono biridsati jojode dacorabotejine catojaridsajarissa nade. ¹⁴Meme naqui pina papeo pico-co-co naqquijarossa nadsa amossi nade. Ssono imeni huapima naqui pajimaranidsana tojaridsajaro. Passo imeni nocconidsa dsama huihuittidsacossieri najaro naqui pajimaranidsana tojaridsade.

¹⁵Nadsapa dsama huapimacca tamedenedi, dsama cacahuadedeni, soldado dossededeni, huapimapa ssonohuajicca siba odinihuaji pohuadenedi tonajimaridsamana, ssonohuajicca siba imeni caji tanihuaji naco pohuadenedi tonajimaridsamana nade. Aja todsepetaji ssequiri najarideni, deni toquejenajarideni huapima naco nama quinade. Aja madijacca dodosse toquejenajarideni, madijacca dodosse toquejena-jararideni huapima naco ssonohuaji pohuadenedi tonajimaridsamanade.

¹⁶Cappinamanadsa attidenipa: – ¡Ssono, siba iadsa cojo nari-ccarah! Bodi iquejenadsapi deni tojahicca huihuittari bicabotedsa huittari canajari ia qqui tabaqqui-jarahijine. Aja Edede Bedicca najidsohue oppinabotedsa ahuatoraqqiri inanijine. ¹⁷Jidapanana Edede Bedi Jeso pohua Imehi tedseje poccadenedi najidsohue imeni tojanijinecca huada bacco tani. Najaro najidsohuepi issijajinijine ipajirajerani –quinade.

Isaraeri bedi 12 quinajarideni potemahi Dio inajanoridsajari

7 ¹Najaro jicadsapi Diocca dodosse tabaqqui 4 quinaha nami jicaqquinihuaji huahueri naridsahi qqui onabaqquide. Ohuahapa maji ccajonahihuaji hua, ohuahapa maji toccahihuaji hua, ohuahapa arobenihuaji hua, ohuahapa arobeni onihihuaji hua naridsamanade. Najaridenipa jojode 4 nehe ecessamanajaro, namidsa jappo-ppo canaridsa-jeranijine. Passo imeni naqui jene torani nanijine, ahua epe naco jene torahi nahijine jojode joma inamanajaro. ²Pohuadenipa dacorehe cajimanajari, nami, passo inajidso-ridsa-mananijine. Nadsapa Diocca dodosse ohuaha maji ccajonahihuaji ccajonahi qqui onajari. Najaripa Dio Camittehe cajijaricca nanajano dsojo najonajari. Nadsapa Diocca dodosse tabaqqui 4 quinaha huahueri nahuajanjaridenidsa jadsirema huahua nade. ³Pohua atti ajama najari: –Aji nami, passo, ahua tinajidsomana-jeraccaji. Nidsa icca Diocca medsedeni assaridenidsa najanoridsaccana –nade.

⁴Nadsapa madija najanoridsamanahi onidenedi omittajaro: 144 mil (144,000) quinade. Najaridenipa *Isaraeri pohua potemahi. Pocca ejedeni 12 quinajaridenicca madija. (Caria attidsapi: 12 tribus, quinajari.) ⁵⁻⁸Isaraeri bedi potemahidenedi najanoridsamanahipa ajama quinajari:

Joda potemahi 12 mil (12,000),
Robano potemahi 12 mil,
Cado potemahi 12 mil,
Asera potemahi 12 mil,

Netari potemahi 12 mil,
 Manase potemahi 12 mil,
 Simeo potemahi 12 mil,
 Rebi potemahi 12 mil,
 Isacara potemahi 12 mil,
 Dsaborona potemahi 12 mil,
 Jose potemahi 12 mil,
 Benjamin potemahi 12 mil
 quinaha najanoridsamanade.

**Madija panahicca eterorideni
 nopoqquri najaridenicca ima**

⁹Najaro ima jicadsapi ocattoma cananeje madija panahicca qqui onabaqquide. Qqui onabaqquiraha onocco ssonaqqui nade. Madija dsama onihi onihidsa madiridsamanajarideni mota, huapideni onihi onihi cajiridsamanajarideni mota, tohuatti onihi onihi cajiridsamanajarideni mota naco qqui onabaqquijaride. Deni tojahicca huihuittari bicabote cahittarinihuaji, Edede Bedi tedsejema huapima domodeni huajari. Eteroridenipa nopoqquri najaro. Diodsa huatidsemanadsa birijari eppe dsojojo dsojojo canade. ¹⁰Attideni mohui tadsa huahua quinade:

–Icca Dio deni toजारipa pocca huihuittaridsa huittarijari.
 Najaripa ia Tonassijade.
 Edede Bedijine naqui icassiejerajaro –quinade.

¹¹Nahi deni tojahicca huihuittari bicabote cahittarini tadsajanima camittehe cajimanajarideni domo huahuajani, aja cacahuadedeni domo huahuajani, nahi idedenihuaji Diocca dodosse tabaqquideni huapima domo huahuajani najari. Najarideni huapimapa Diocca huihuittari tadsajanima pohuadani pitodsa jassi tadsa

tocattedsamanaadsa assarideni namidsa bacco tadsapa Diodsa huatidsemanajari. ¹²Attidenipa ajama quinajari:

–¡Pajissa nema nana!
 Dio, Tiadsa etidsedsa: Tiana deni tijani, inajaro.
 Ticca deni tojehe nema dsanaponitohui.

Tiana nahato tinani ojari tani.
 Tijine bica tani, icca Tamine deni tijani ojari tani.

Ticca dacorehe deni tojani,
 bica tani.

Tiadsa icca huatidsehe nema dsanaponitohui, inajaro.

¡Pajissa nema nana! –quinade.

¹³Nadsapa cacahuade 24 quinajarideni ojaria ohuadsa huati tajari: –Aja eterorideni nopoqquri najaridenipa ¿nejecojarideni? ¿Nahato tinaqui? ¿Nejecohuajicca jahijonajari? –nade. ¹⁴Naraha manaco pohuadsa huati onade: –Tiana nahato tinani –onade. Nadsapa ohuadsa huati tapomade: –Ajajaridenipa namidsa ocasserani imeni tonahana-manaraha Jesocristo tahimari nebomana-jarajari. Edede Bedi Jeso pohua emene toccajarojine poccadeni tabaccorehe tomossijaro. Najaria aja etero noponi cajimanajaripaja. ¹⁵Najaria aja Diocca huihuittari bicabote tadsajanima huapima domodeni huajaripaja. Diodsa dada toqqimacca odsahuaji huatidsemanadsapa dsome dsepedeni ijimana, ssiaja dsepedeni ijimana najari. Deni tojahicca huihuittaridsa huittari cacajaripa pohuadani cacahuade pohuadendisa madiridsahitohui. ¹⁶Nadsapa pemimana-jarahitohui, baccodeni naco dsarimana-jarahitohui. Maji

poconejine imedeni camana-jarahitohui. Ppoconi naqui pohuadenidsa ocassera tejeranitohui.
¹⁷Najaro ima tojanijinepi aja Diocca huihuittari bicabote tadsajanima Edede Bedi huajarina pohuadeni ecahuabaqquihitohui. Pina edede cacahuade pocca edede ecahuabaqquijarissa nahitohui. Passo bicani camittehecca sibadsa qqenajarocca dse dse dsanapomanahijine pohuadeni eccaridsabaqquihitohui. Poccadeni ojiepi Dio inajicanitohui. Noccodeni ppejene sse inaridsadsapa denima oji quinarahitohui —nade cacahuade ojaría atti.

**Nepi tamaroni jicanicca
ssoja ijidsajaro**

8 ¹Papeo pico naqquni nepi tamaroni 7 najaro jicarínicca Edede Bedi ssoja ijidsadsapi memehuaiji madimanajarideni huapima maji ojaría tocadidire najari. (Caría attidsapi: media hora, quinajari.)
²Dsotodepa Dio Pohua tedsejema pocca dodosse tabaqqui memehuaijicca 7 quinaha domo huahuajanihi qqui onabaqquijari. Pohuadenidsa jei jei 7 naha da inaridsajari.

Nahatohui majo bicabote

³Dsotode Diocca dodosse ohuaha ccajonajari, *nahatohui majo bicabote totohuessicca huahuanari tadsajanima huajari. Pohua dsepedsa tasao oro nahatoni majo bicabotejine dsojo icajidsajari. Nadsapa pohuadsa nahatohui majo bicabote huapi taha da quinajari, iessihijine. Iessidsapa essene majo Diodsa pajissa quinajaridenicca huatinaja tadsajani Diodsa bacco

bacco tajaro. Nadsapa huihuittari bicabote tadsajanima totohuessicca huahuanari oro nahatoni tetepinidsa iessijari. ⁴Nadsapa Diocca dodosse dsepedsa dsojo icajidsajari majo bicabote jamimine aja Diodsa pajissa quinajaridenicca huatinaja tadsajani toccamacossadsa Diodsa bacco tajaro. ⁵Nadsapa Diocca dodosse tasao dsojo icajidsajaridsa majo bicabote totohuessicca dsippo ononi jadarini inajijaro. Nadsapi namihuaiji quissa inaronaneje oppina tehe tojaridsajaro. Ttororo caneje, mohuini jidsa tehe tomohuiridseje, ssiehe caneje, namihuaiji naqui nami dsadsa neje najaro.

Jeijeidsa jei jei quinajari

⁶Nadsapa Diocca dodosse tabaqqui 7 quinajari jei jei 7 naha cajimanajaridenipa najoramajari, jei jei quinahijine. ⁷Nadsapi Diocca dodosse tahidecca jei jei nanaja passo ccara tojani, dsippo jadarini tohuemene quejemeh quissa inaronajaro. Najarojine nami arobeni diji tadsapi ahua mota diji, dsero nemanehe diji taridsajaro. (Arobenipi caría attidsa: tercera parte, quinajari.)

⁸Nadsapa Diocca dodosse dsotodecca jei jei nanaja jororoni imeni pina ssono imenissa najaro coro inaronadsapi passo imenidsa ssonippajaro. Nadsapi passo imeni arobeni tohuemene tojaridsajaro. ⁹Passo imeni abari mota jica, canoa imenibotecca mota tojica, canoa bedenicca mota tojica najari.

¹⁰Nadsapa Diocca dodosse 3'cca jei jei nanaja abadsico bedi mota cajirajari memehuaiji diji tocanaha jororone motarehema cassonajari.

Nami arobenidsa cassonadsa hueni motadsa, passo sibatadsa qquenajaro motadsa cassonipparidsajari. ¹¹ Abadsico bedi mota cajirajari onipa: Bidabote. Najarijine passo motapi tobidaridsajaro. Najaro passo dse quinadsapa madija huapi taha cacotaridsajari.

¹² Nadsapa Diocca dodosse 4'cca jei jei nanaja maji arobe totabaccora, abadsico arobe tocatabaccora, abadsico bedi mota totabaccoraridsa najari. Nadsapa huapima arobe ohuiridsajari. Najarojine ssiajani arobenipi tossiajani nejerani. Dsome arobeni naqui tossiajani nejerani. ¹³ Dsotode meme napicossanidsa ssibiri potajari toccahi qqui onajari. Toccadsa atti mohui tahi omittajaro. Pohua atti ajama najari: –¡A, jaho! Namicca madijapa tohuati nahanaquiqui nahitohui. Nidsa Diocca dodosse tabaqqi ohuahadeni 3 quinajari jei jei quinadsapa ima denima oppina tanicca tojanitohui –nade ssibiri potajari.

Diocca dodosse 5'cca jei jei najari

9 ¹ Nadsapa Diocca dodosse 5'cca jei jei nanaja memehuajicca abadsico bedi namidsa cassonadsa cahittahi qqui ocanajari. Najaripa Diocca dosseniji. Pohuadsa *nami odini huaji tanicca pipico da inajari. ² Nami odini huaji tanicca noccobiji itabojidsaneje odi bodihuajicca essení qquenajaro. Pina dsippo imenibote jororoni essenissa najaro. Najaro meme ijidsapi tosohueni nadsa maji amossi najari. ³ Najaro essenidsa sese ahuatomanadsapa namihuaji jahironana

canaridsajari. Nadsapa nami huapimadsa ijiridsajari. Madija itahuajina-manahijine comenedeni dacorehe cajiridsamanajari. Pina dsorima ssidede orissa naha pohuadenidsa da inaridsajaro. ⁴ Pohuadeni dossede attipa: –Dseropi tinajidsomana-jeraji, moro taridsahicca tinajidsomana-jarajo, ahua appani naqui tinajidsoridsamana-jeraji. Naraha madija assaridenidsa Diocca nanajano cappiramanajari-denira tinajidsoridsa-baquimanajo. ⁵ Naraha tijinedeni ahua-jeraji, onajaro –najari. Nadsapa abadsico 5 canaha pohuadeni comene madijadsa inanaridsamanadsapi pina dsorima ssidede comene ahua-manajarissa quinahitohui.

⁶ Nidsaranibote najaro ima tojadsapi madija ocasserani ahumanadsa attidenipa: –Ijica naccaraho –quinahitohui. Naraha dsoqqehe pohuadenidsa huaji tanitohui.

⁷ Sese huapimapa pina bojo jadsiretohui najoramanajarissa quinajari. Tatidenidsapi oro nahatoni pina tamine taticcassa najaro huittaridsajaro. Panodenipa pina madija pano naridsamanajari. ⁸ Tatideni conepa pina amoneje tatinideni conanissa quinajari. Inodeni naco pina dsomaji inossa quinajari. ⁹ Pohuadeni assire cacahuamanahijinepa ppejo nahatoni ccarabote jadsirejinecca huedsamanajari. Eppedeni mohui naco pina nami jojoppade bojocca huapi tehe jadsiretohui domoni toccajaro mohuini dacorajarossa najaro. ¹⁰ Dsoporidenidsa naco pina dsorima ssidede ori comenessa naha cajiridsamanajari. Najaridsa abadsico 5 canaha madija

inajidsobaqqi-manahijine. ¹¹ Sese-denipa tamine cajimanahi. Pohnuapa nami odini huaji tanicca cacahuade. Pohua oni jodiodeni atti ebreodsapa: Abadón, quiquinanajari. Dsama Cresiaccia madija attidenidsapa: Apolión, quiquinanajari. (Najaripa: Toponi nanajicade, inajaro.)

¹² Nadsapi ima oppinabote tahidecca jicaraha denima pamehe dsoriri taccani.

Diocca dodosse 6'cca jei jei najari

¹³ Nadsapa Diocca dodosse 6'cca jei jei nanaja tohuatti omittajaro. Dio baccohuaji huahuanari oro nahatoni orini 4 najaro nocconidsa tohuatti mohuini qqunenajaro.

¹⁴ Najaro tohuattipi Diocca dodosse 6'cca jei jei najaridsa ajima najaro: –Diocca dodosse tabaqqi memehujicca 4 quinajarideni hueni imehi Eoparatehuaji ssoque toppidsa ecahuabaqqijari. Jahiridsahijine tappa tinabaqqiijo –najaro.

¹⁵ Nadsapa Diocca dodosse tabaqqi 4 quinajarideni tappa inabaqqijari. Madija mota inajicaridsamanahijine jai tojjari. Pohuadenipa najaro imadsa dsepedeni ijiridsa-manahijinepa najoramana-pojari. Aja pohuadeni dsepe ijihijinecca maji, huada, abadsico, huajano bacco tadsa dsepedeni ijimanajari. ¹⁶ Poccadeni soldado bojo idedsa jassi tarijaridenipa 200 millones (200,000,000) quinajari.

¹⁷ Najaropi Dio Corimejine onocodsas ahuato tajaro. Aja bojodsa jassi tarijaridenipa ajama quinaha qqui onabaqquide. Pohuadeni bacco cacahuamanahijine ppejo nahatoni ccarabote cajiridsamanajari.

Baccodeniccapi pina dsippo jororoni macco tajarossa najaro, pina meme sohuenissa najaro, pina *azufre huesse tajarissa najari cajimanajari. Bojo tatidenipa pina dsomaji tatisa quinajari. Pohuadeni ajaridsapi dsippo jororoni qqena, dsippo essenis qqena, azufre majo tabaccora najari qqena najari. ¹⁸ Aja bojo ajaridenicca 3 naha qqunenajari comenejine madija mota cacotaridsajari. Najaropi dsippo jororoni, dsippo essenis, azufre majo tabaccora najari comenejine. ¹⁹ Bojocca dacorehepi pohuadeni ajaridsa, pohuadeni dsoporidsa najaro. Bojo dsoporidenipa pina maccassa naridsamanajari. Dsoporideni cotanidsa pina macca tatissa naha cajimanajaridsa comene inanaridsamanajaro.

²⁰ Naraha madija dsippo jororoni, dsippo essenis, azufre majo tabaccora najaridsa cacota-jarajari motadenipa bodideni cacajiquimera-jarajari. Tabaccorehe inamanajarocca nebomana-jarajari. Aja Satanacca dodosse tocorimedenisa huatidsede nebomana-jarajari. Pohuadeni cacahuade pohuamacca pina ccarara bicabote oro, plata, bronce nahatoni, siba, ahua nahatoni naqui huapimapi qquide ssamoqquri, mittamanahijine ssamoqquri, jahiridsahijine ssamoqquri naraha najaridsa huahuatidsemana najari nebomana-jarajari. ²¹ Madija nana-dsoqquede, caribajade, huananehe, botie naco nebomana-jarajari.

Diocca dodossepa papeo bedeni dsojo tojjidsajari

10 ¹ Nadsapa memehuaji qqui onanaja Diocca dodosse dacorabote ohuaha meme essenima

quejemaha ccaronajari. Pohua tati-
 dsa meme janoni porimacossani-
 ssa najaro cajiari. Panopa pina
 maji ssiejenessa najari. Issopa
 pina dsippo jororoni pamajarossa
 najaro. ²Pohua dsepedsa papeo
 pico naquini bedeni dsojo ijidsa-
 jaro. Pohua amori nahatoniccapi
 passo imeni tetepidsa cahari, amori
 ssamohuajiccapi namidsa cahua
 nadsa huajari. ³Jadsirema johua
 nadsapa pohua atti mohuini pina
 dsomaji huahuade huahua najari
 mohuinissa najaro. Aja pohua johua
 nanaja ttotorode 7 nehe tomohui-
 ridsapsapi attinideni omittajaro.
⁴Ttottorode attini jicadsapi attini-
 deni dsodo onanitohuiraha meme-
 huajicca atti omittajaro. Ajama
 najari: –Ttottorode attini timitta-
 jaropi tia motta tibodidsa tecahuaji.
 Dsodo tejeraji –najari.

⁵Naraha aja passo tetepidsa amori
 cahari, namidsa amori cahua nadsa
 huajaripa pajissara huati tahijine
 pohua dsepe nahatonicca memehuaji
 da icanajaro. ⁶–Aji huati onajaropi
 Dio Pohua onima pajissara huati
 onajaro. Diopa nadsama madijona-
 jari. Meme inahato, nami inahato,
 passo imeni inahato najaro. Aja Dio
 Pohua inahatoridsajarodsadi-
 ridsamanajari naco Dio Pohua
 inahatoridsajari. Ohuattipi pajissa.
 Ima jicanijinepi najo-jeranitohui.
⁷Diocca dodosse jicarihicca jei jei
 nadsapa Diocca ima ajiaro dsama-
 cca madijadsa ahuato inapano-jera-
 ccajaro ahuato inananitohui. Najaro
 imapi Diona Pohua Atti cacomera-
 qquiri najarideni mari icanabaqqui-
 pojari –najari.

⁸Aja memehuaji atti omittapojari
 ohuadsa huati tapomajari: –Jari,

passo imeni tetepidsa amori cahari,
 namidsa amori cahua najaridsa
 ticcaji. Pohua dsepecca papeo pico
 naquini tohuabajaro tidiji –najari.
⁹Nadsapi Diocca dodossehuaji occa-
 jaro. Papeo pico naquini bedeni-
 tohui pohuadsa huati onajaro.
 Nadsapa ohuadsa huati tajari: –Aja,
 ajiaro papeo tijipaji. Tejeridsapi
 majona tajaro. Pina jidsi oquinessa
 nanitohui. Naraha tidsonedsana
 tobidani nanitohui –najari.

¹⁰Nadsapi Diocca dodosse dsepe-
 cca papeo pico naquini bedeni
 odidsa ojipajaro. Ohuajaridsapi
 majona tajaro. Pina jidsi oquinessa
 naraha ohuidsonedsana tobidani
 najaro. ¹¹Nadsapa ohuadsa ajama
 najari: –Madija huapimadsa, aja
 dsama onihi onihidsa madiridsa-
 manajaridenidsa, tohuatti onihi
 onihi cajiridsamanajaridenidsa,
 taminedenidsa naqui Dio pohua-
 denidsa inananijine tahimari huati
 tinaridsapomaji –najari.

Dio Atti cacomerabote pamahacca ima

11 ¹Nadsapa ohuadsa
 nanattome huenicca bobassa
 najari da inajari. Nadsapa ohuadsa
 da inajaripa ohuadsa huati tajari:
 –Titehemadsa ticcaji, Jerosare-
 cca Diodsa dada toqquimacca odsa
 nattome, *Diodsa da tahijinecca
 huahuanari nattome taji. Nahicca
 madija Diodsa huatidsemanajari
 hua taridsajo. ¿Nejecoma quinaha
 animanajari? –najari. ²–Naraha
 Diodsa dada toqquimacca boronipi
 nattome tejeraji. Najaro boronipi
 jodio quejena-jarajaridenidsa tojani.
 Najaridenipa abadsico 42 canaha
 Diocca odsa panani bicabotedsa

madimanadsapa pohuadenijine totabaccoranitohui. ³Nadsapa *Dio Atti cacomerabote pamaha ocadossebaquihitohui. *Etero jidsa tanicca pina madija ocasserani ahuamanadsa huedsamanajarissa najaro huedsamanadsa huada 1,260 nehe (abadsico 42 canaha) nama quinahitohui Dio Atti ehecomeramana nanitohui –najari.

⁴Aja Dio Atti cacomerabote pamahapa pina ahua onini oribo pamahassa quinajari. Pina jojororo pinine capamahassa quinajari. Ia Medsede dsama nemanehede Cacahuade tedsejema huatide bajari. ⁵Madija attidenipa: –Dio Atti cacomerabote pamaha inajidso-baqquina –quinaraha manacora pohuadeni ajari jororoni qquenajarodsa pohuadeni jarade diji tocaniredsapa ono toquejenahissa tahitohui. Nama quinadsa pohuadeni najidsode tohuini quinajarideni tojicahitohui. ⁶Dio Pihuajine nahatohue cajimanadsapa memecca passo ecossamanajaro. Abadsico 42 canaha Dio Atti cacomerade toquejenadsapa pohuadenijine namihuaji passo qqejerajaropaji. Dio Pihuajinea nahatohue onihi onihi cajimanadsapa pohuadenijine passo tohuemene tojajaro. Ocasserehe onihi, onihi naqui dsama nemanehedsa inaridsamanajaro. Pihuadenipa: –Ijine madija ocasserani ahuamanana –quinadsapa nema inamanadsanapojaropaji.

⁷Dio Atti ecomera-ridsamana-jaro jicanissa tadsapi bani siri imehi jidsabote *nami odini huaji tanihuaji qquenadsapa pohuadenidsa ssonarihitohui. Pihuana deni

tojadsapa inapamajonahitohui.

⁸Nadsapa ia Medsede ahua porimacossanidsa coba idsanamanadsa dsoqquehicca odsa pananica jahuidsa assiredeni pparahi codahitohui. Najaro odsa panani oninipi Jerosare naraha onini ponimacca hua quinarona: Imasiri sseqquiri najaridenicca odsa panani Sodoma, quiquinanajari. Onini onihi naqui: Diodsa iboqquri najaridenicca dsama Ejito, quiquinanajari. ⁹Nahidsa huada 3 denima huada arobeni assiredeni codajari qquide madija jahijonana canahitohui. Madija panahicca ohuaha ohuaha naridsamanajarideni mota, madija huapideni onihi onihi cajiridsamanajarideni mota, tohuatti onihi onihi cajiridsamanajarideni mota, dsama onihi onihi-dsa madiridsamanajarideni mota jahijonana canahitohui. Najarideni huapimapa ppa idsabaquimana-jarahijine eccocobaqqui-manahitohui. ¹⁰Dio Atti cacomeraqquri najarideni pamahapa ajijaro dsamacca madijadenidsa oppinehe imeni inaridsamanajarojine pohuadenidsa nacasseraqquri najari. Nadsapa topamajonajarijine madijapa huatidsemaneri nahitohui. Catidserara canadsapa pohuadeni dsepetaji pohuadeni tessedsa manaconi jirehe ahuaji da, ahuaji da quinahitohui.

¹¹Naraha huada 3 denima huada arobeni jicadsapi Djoline camittemani-manadsa totehemamanajari. Nadsapa madija huapima cattomama canajarideni cappinamanahissa tajari. ¹²Nadsapa aja Dio Atti cacomeraqquri najarideni pamahapa memehuajicca atti mohuidacoraha mittamanajari. Pihuadeni pamahadsa: –¡Nija, ahuaji

ticadamacossaji! –najari. Nadsapa pohuadeni huadide cattomama canaraha meme essenima quejemanaha tohuedamacossajari.

¹³Naneje amadsati namidsadsa imeni tojadsapi odsa panani mota barari-ridsadsapi catojaridsajaro. Najarojine madija 7 mil (7,000) quinaha jicajari. Nadsapa tocassiejeraridenia cappinamandsa: –Memehuaji madijaripa Dio dacorahi, deni tojahi –quinajari.

¹⁴Nadsama ajijaro dsamacca madijadsa ima oppina tajaro pamehe jicaporaha nidsa onihi tojapomaccanitohui.

**Diocca dodosse 7^{cca}
jei jei najari**

¹⁵Diocca dodosse tabaqqi 7^{cca} jei jei nanaja memehuaji attideni mohuiqqiri naha huati huati toquinajari:

–Jidapapi dsama huapima ia Medsede Diocca cacahuehe toja,

Cristo-Mesiacca cacahuehe toja najaro.

Pohuadenina dossede nama dsanapomanahitohui

–quinajari.

¹⁶Nadsapa cacahuadedeni 24 quinaha Dio tedsejema taminedenicca huihuittaridsa jassi tarijaridenipa pohuadeni pitodsas jassi tadsa tocattedsa-ridsamanadsa panodeni namidsa bacco taridsadsapa Diodsa huatidsemanajari. ¹⁷Nadsa attidenipa:

–Ia Medsede Dio Tiapi dacorbote ojari tani.

Tiapi nadsama timadipojaropi timadi-dsanapojaro.

Tiadsa etidsejaro, ima bicani tinanani.

Aji ticca dacorehe huapimadsa tijine ahuato tinanaridsajaro. Jidapapi dsama huapima dossede tijajaro.

¹⁸Nadsapi dsama onihi onihi naridsajarocca madija tiadsa huadimanajari.

Naraha jidapanana ticca huadie tojaridsanijinecca huada bacco tani.

Nadsapa jicamanapjaridenicca ima pohuadenidsa huati tinadsapi poccadeni imasiri manaconi pohuadenidsa najidsohue tinassonari-ridsanitohui.

Naraha ticca medse Tetti cacomeraqqiri najaridenidsapi manaconi bicabote da tinaridsanitohui.

Tiadsa toquejenajari huapimadsa naqui da tinaridsanitohui. Najaro manaconi bicabote da tinaridsajaropi ajamani toquejenjaridenidsa, deni toquejenjaridenidsa aja huapima tinoppine cappinamandsa Tettidsa iboraqqiri najaridenidsa tinanaridsanitohui.

Jidapana naqui ajijaro dsama inatabaccoraridsamanajarodenicca tabaccorehe manaconipi pohuadeni tinajicahitohui –quinajari cacahuade 24 quinajarideni.

¹⁹Nadsama memehuajicca Diodsa dada toqqimacca noccobiji tohuabajaro. Najaro bodidsapi Moisesicca madija *Dio Pohua tedseje jehe canirejaricca baho cahato najaro. Nadsapi ssiehe canaridsajaro, mohuini imeni tomohuiridsajaro. Ttottorode ttororo

canaridsajaro, nami naqui dsadsa najaro. Passo ccara tojani naqui jadsirema catojaridsajaro.

Amonejecca ima, Huama imehibotecca ima

12 ¹Ima nahatoqquiri inanijine memehuaaji amoneje ahuatojaro. Ponicca eteropi pina maji ssiejenessa nehe huedsajaro. Abadsico tetepidsa huarijaro. Tatinidsa tamine taticca huittarijardsa abadsico bedi 12 canaha cajihuajani-jari. ²Najaro amonejepi idsonidsa ejedeni huittidsajari. Tossonahijine comadsapa johua johua najaro. ³Dsotode naqui memehuaajicca ima onihi nahatoqquiri inanijine ohuadsa ahuatojaro. Qqui onanaja pina huama imehibotessa naraha jidsa tajari. Macco tajari. (Caria attidsapa: dragón, quinajari.) Tatipa 7, ori 10 najari. Tati 7 najarodsa tamine taticca huittariridsajari. ⁴Nadsapa huama imehibotepa abadsico bedi mota (Caria attidsapa: tercera parte, quinajari) pohua dsoporidsa jadsirema johue inaronabaqquidsapa namihuaji hua inaronabaqquijari. Nadsapa huama imehibote amoneje idsoni comajaro tadsajanima huajari. Ejedeni tossonadsapa amadsati jipahijine najorajari. ⁵Naraha ponicca ejedeni maqquideje bedi tossonadsapa madijari. Najaripa nidsa dsotode dsama huapimacca tamine dacorabote tojahitohui. Pocca dsodsojo ccanaja tajaridsa pocca madija dosse dosse nahitohui. Naraha ponicca ejedenipa todinimacossanijari. Nahi Dio Pohua huittarihidsa dossede huittarijari. ⁶Naraha imenipi dsama huamoni ssono caji,

siba caji tanihuaji joppa tajaro. Aji poni joppa tanihuaji madinijinepi Diojine najorapojaro. Nanihuajipi taparini cajidsanaponijine huada 1,260 nehe madijaro.

⁷⁻⁸Dsotodepi meme nopicossanidsa jadsire tojani qqui onajaro. *Diocca dodosse tabaqquidenicca tamine Miqueopa pocca dodosse tabaqqi tedseje huama imehibotedsa jadsire inanamanajaro. Huama imehibotepa pocca dodosse tabaqqi Miqueocca dodosse tabaqqi tedseje cahadiremanaraha huamadenipa deni toquejenahijine pajiramana-jarahi. Memehuaaji madimana-pomahijinepa jicani. ⁹Nadsapa huama imehibote cco inaronamanajari. Najari huama imehibotepa maittaccadsama pina maccassa naha ahuatopojari. (Najarina Adana Ebadeni icamaidsa-baqquijari.) Pohua oni ohuahapa: Diocca huadi *Satana, quiquinanajari. Pohua, pocca dodosse tabaqqi namihuaji hua inaronamanadsapa namidsa catojaronajari. Nama nadsapa dsama huapimacca madijadsa maidsa maidsa nanaridsa najari. ¹⁰Nadsapi memehuaaji tohuatti mohuini omittajaro attipa:
 – Jidapanana ia Medsede ia tonassijabaqquihicca ima bacco tani.
 Jidapanana Diocca dacorehe, pocca cacahuehe iadsa ahuato tani.
 Dio pocca Cristo-Mesia pohua dosse dosse nahicca ima bacco tani.
 Ajana, imecotedeni tahimari pohuama huattijide rabote Satanapa coro inaronajari.

Dsome, ssiaja, dsome, ssiaja
 icca Abi Dio tedsejema
 imecotedenicca ima huati
 huati nanaja naraha jidapapi
 pocca ima jicani.
¹¹ Imecotedenipa deni toquejena-
 jari. Satanapa ajamani tojahi.
 *Edede Bedi Jeso dsoqquedsa
 emene toccajarijine,
 pohua tahimari ecomeraridsa-
 manajarojine naco deni
 toquejenajaripaja.
 Pohuadenipa dsoqquehe
 noppineni cappinamana-
 jarajari.
 “Idsoqquedsa naqui bica tani.
 Dio inebo-jarahitohui”
 quiquinanajari.
¹² Nadsama memehuaaji timadi-
 manajaro huapimapi tetidse-
 maneri naji.
 Naraha aji namihuaji timadi-
 manajaro, passo imenihuaji
 timadimanajarodenipi tohuati
 nahanaquqiri tiquinani.
 Tiadenidsa ima oppina tehe
 tojaridsanitohui.
 Diocca huadipa tiadenidsa
 huadihijine toccaronajari.
 Pocca ima jicabote nani nahato
 tadsapa huadie imeni cajiari
 –najari memehuaaji tohuatti
 mohuini omittajaro.
¹³ Huama imehibote bodi huato-
 dsapa: –A, namihuaji ohua coro
 naronajariraha –najari. Nadsapa
 amoneje ejedeni maqquideje
 bedi cajiye najaro inandsoqque-
 nijine qquidso qquidso naridsa-
 jari. ¹⁴ Naraha amoneje huaji tani
 toccanijinepi pina ssibiri imehi-
 bote eppessa najari capamaha da
 quinajari. Nadsapi poni madinijine
 dsama huamoni ssono caji, siba

caji tanihuaji huama huaji tahi-
 huaji toccanijine appani cajiario.
 Nanidsapi poni ecahuamana-
 dsanapodsas huajano 3 denima
 huajano arobedsa madinijine.
¹⁵ Naraha huama imehibotepa
 amoneje toccanijine najorani qqui
 tadsa pohua ajaridsa passo mota-
 rema capiri inajaro, hueni tocaja-
 dsa totabonijine. ¹⁶ Naraha namipi
 amoneje acco icamajaro. Nami
 odini tohuabajaro. Pina ajarini caji-
 jarossa najaro. Nadsapi huenicca
 passo nemanehed dappi idsimajaro.
¹⁷ Nadsapa huama imehibote amo-
 nejedsa denima huadi tadsapa poni
 potemanidsa jadsire inananijine
 toccajari. Aja Diocca dossenijidsa
 iboraquqiri najari, Jesocristo tahi-
 maridsa disseraquqiri najaridenidsa
 jara jara najari. ¹⁸ Nadsapa huama
 imehibote passo imenicca ssiquidsa
 huajari.

Bani siri jidsabote passo imenidsa qqemorajari

13 ¹ Ocattoma cananaja bani
 siri imehi jidsabote passo
 imenidsa qqemorajari. Tati 7, ori
 10 naha cajiari. Ori huapimadsa
 tamine tatidenicca huittariridsajari.
 Bani siri tati huapimadsa tohuaoni
 tabaccora tanicca dsodo naridsa-
 jaro. Tohuaonipi Diodsa ocassera
 tani. Pina Dio onidsa tatamasso
 najarissa najaro. ² Bani siri jidsabote
 qqui onadsapa assire pina dsomaji
 jano potahissa naraha amoripa pina
 bani siri imehi oso amorissa najari.
 Pohua ajari naco pina dsomaji
 huahuade ajarissa najari. Huama
 imehibotepa bani siri jidsabotedsa
 pocca dacorehe da inajaro. Pocca
 huihuittari bicabote naqui pohuadsa

da icanajaro. Najarodsa huittaridsa dossehe dacoraniccadsa dossede tojahijine huama imehibotecca dossehe bani siri jidsabotedsa da inajaro. ³Bani siri jidsabote tati 7 naraha tati ojariepi biqueradsa pina dsoqquejarossa najaro. Naraha bejorini ccaqquidsapi camitemanijaro. Nadsapa dsama huapimacca madija huajo caniredsa pohuatohui disseraqquri najari. ⁴Huama imehibotedsa huatidsemanajari, aja bani siri jidsabotedsa pocca dossehe da inajarojine. Bani siri jidsabotedsa naco huatidsemanajari. Pohuadeni attipa: –Bani siri jidsabotepa dacorajari. Pina aja pohuassa najari nohuerahi. ¿Nejecojarina pohuadsa ssonaridsa deni tojahijine pajirahi? –quinajari.

⁵Bani siri jidsabotepa Diodsa tatamasso nadsapa: –Dio nohuerahi, ohuana huapimadsa deni ojani ojari onani –nanaja najari. Naraha Diopa bani siri jidsabote dossede tojahijine ecossa-jeraccajaro. Abadsico 42 canaha dossede tojaccajari. ⁶Nadsapa atti tabaccora tadsa Diodsa atti atti dsanapojari. Dio oni ajimani inanajaro. –Diocca mamadi tabaccora tani –nanaja najari. Memehuaji madimanajari-denidsa naco tatamasso najari. ⁷Nadsapa bani siri jidsabotecca ima huacossa-jeradsapi Diodsa toquejenajarideni tedseje cahadiremana-dsanapojari. Deni tojadsapa motapa inajicaridsajari. Nadsapa madija huapideni onihi onihi cajiridsamanajarideni, tohuatti onihi onihi cajiridsamanajarideni, dsama onihi oniheidsa madiridsamanajarideni naco bani siri jidsabote pohuana dosse dosse najari.

⁸Ajjaro namidsa madiridsamanajarideni *camittehe cajimana-dsanapohuijinecca papeodsa onideni dsodo nani nohuerajaripa bani siri jidsabotedsara huatidseridsa-manajari. Najaro papeo dsodo nanipi dsama nahatoponidsama Edede Bedi Jeso pohuana ecahuajaro. Puhuana camittehe issiajanicca icajiridsanijine dsoqquejari.

⁹Teribodeni ticajimanadsapi ohuatti timittamananissa taji. Bani siri jidsabote tamine tojadsapa Diocca madija ajama quinahitohui:

¹⁰Diocca madija toponi cocorodsa hua todsimahijinepa itadamanadsa hua todsimahitohui.

Diocca madija huahuajinadsa itahuajinamanahijine naco huahuajinadsa tojicahitohui.

Najaro ima tojadsapi Diocca madijapa ajama quinahitohui: Oppinani ahahuamana naraha Diocca dacorehema mohuara-dsa ihinahanamana nanitohui. Ocasserani ahahuamana naraha Diodsa jehe quinahi nebomanajarahitohui.

Bani siri ohuaha namidsa qquenajari

¹¹Qqui onapomanaja bani siri ohuaha namidsa qquenajari. Ori pamajari, pina edede bedi orissa najari. Naraha pohua attipa pina huama imehibotecattissa najari. ¹²Pohuapa tahidecca bani siri jidsabotecca dossehe cajijari. Nadsapa namihuaji dossede tojadsa aja tahidecca bani siripa cattade huajari. Nadsapa bani siri dsotodeccana namidsa madiridsamanajarideni huapima tahidecca bani siridsa huatidsemanahijine

icadossebaquijari. Aja pohuadsa huatidsemanajaripa tati biquera-dsa dsoqqueraha bejo ccaquiqui-dsa camittemanijari. ¹³ Bani siri dsotodecca naco canahatori canajari. Pohuajine memehuaji jororoni ccaronadsa namidsa bacco narona-jaro. Madija huapima qqui toquina-jari. ¹⁴ Namihuajicca madija icamaidsabaquihissa tajari. Tahidecca bani siri jidsabote cattade huahihuaji canahatoriri canadsa madija huapima pocca maidsehedsa pajissa quinajari. Pohuadene icadossebaquidsapa tahidecca bani siri jidsabote corime siba-dsa inahatomanajaro. Najari bani siripa massito jadsira tocanajaro-dsa tati biqueraraha madiccejari. ¹⁵ Naraha bani siri dsotodeccadsa dacorehe da inadsapi tahidecca bani siri corime camitta inanajari. Camittemanidsana atti cajidsapa pohua corimedsa huatidsemanajararideni huapimapa jicaridsahijine icadossebaquijari. ¹⁶ Nadsapa bani siri dsotodeccana denima ima inanajaro. Madija huapima tahidecca bani siricca nanajanodsainajanoridsahijine icadossebaquijari. Ejedeni, jadahi, dsepe sseqquiri najarideni, cappiramanajarideni, madijacca dodosse toquejena-jararideni, madijacca dodosse toquejenarideni huapima inajanoridsajari. Motapa dsepedeni nahatonihuaji inajanoridsa, motapa assaridenidsa inajanoridsa najari. ¹⁷ Aja bani siri jidsabotecca nanajano madija motapa pohua oni dsodonani cajiridsamanajari. Motapa pohua onicca numero dsodonani cajiridsamanajari. Madija pocca nanajano cappiramanadsapa mitta

quinahijine ssamo, da quinahijine ssamo tanitohui.

¹⁸ Ajijaro ima nahatoququiri tiquinanijinepi madija Diocca nahatohue cajijari bodi nahatojarina bani siri jidsabotecca numero inatassaquina. Pocca numeropi madijadenicca. Najaro numeropi 666 najaro.

Edede Bedi 144 mil quinajarideni tedseje

14 ¹ Nadsapa ocattoma cananaja *Edede Bedi Jeso ssono *Siodsa hua canahi qqui onade. Pohuadsa madija 144 mil (144,000) quinaha domo huajari. Assaridenidsa dsodo nanipi Edede Bedi Jeso oni, Imehi oni cajimanajari qqui onajaro. ² Nadsapi memehuaji mohuini bica tehe omittajaro. Pina hueni huapima ssahaha canajarossa najaro. Pina ttottorode dacorabote mohuinissa najaro. Pina titirededeni huapi taha tire tire quinajari mohuissa najari. ³ Nadsapa 144 mil quinaha ajie dsati jiri jiri quinajari. Pohuadenipa Diocca huihuittari bicabote tadsajanima aja camittaqquiri najari 4 quinajari tedsejema, cacahuadedeni 24 quinajarideni tedsejema jiri jiri quinajari. Madija ohuahadenipa poccadeni ajie tocahatterahijine ssamoququiri naraha 144 mil quinajaridenira najaro ajie jiride nahatoququiri najari. Najaridenipa ajijaro namidsa madimanaporaha Dio idinibaquijopari. ⁴ Poccadeni ima ssiaja tajaro. Huananehe jirehe madimanajari. Amonejedsa ssamoququiri najari. (Najaro imapi dio pohuamaccadsa huatidsemanajarajari.) Edede Bedi Jesodsa disseraquiri nadsapa

pohuadsara ahuaji jai toja, ahuaji jai toja naridsajari. Najaridenipa namicca madija mota Dio idini-baquipodsa Pohuadsa toquejenahissa, Edede Bedi Jesodsa toquejenahissa tahijine pina madijadenicca daniji bicabote Diodsa tojararissa quinajari. ⁵Pohuadenipa maidsehe huatiraququiri najari. Imasiri cappiramanaha madimanajari.

**Diocca dodosse tabaqqui
3 quinajaridenicca ima**

⁶Nadsapi Diocca dodosse ohuaha qqui onade. Memehuaji ccahuajadsa Dio ia tonassijabaquihijinecca ima eccahuajajaro, namidsa madimanajaridenidsa huati taridsahijine. Aja madija dsama onihi onihidsa madiridsamanajaridenidsa huati, madija huapideni onihi onihi cajiridsamanajaridenidsa huati, tohuatti onihi onihi cajiridsamanajaridenidsa naco huati naridsahijine. ⁷Nadsapa pohua atti mohui tadsa huati tajari: –Dio noppine ticappinamanaji. Diodsa: “Tiana deni tijani” tiquinaji. Dsama huapimacca madijacca imasiri manaconi najidsohuepi Dio Pohuajine tojabote nani. Pohuana meme inahato, nami inahato, passo imeni inahato, passo sibadsa qqenanicca inahato naridsajaro. Pohuadsara tetidsemanaji –najari.

⁸Dsotode Diocca dodosse ohuaha toccamissajari. Pohua attipa: –¡Odsa panani deni tojanicca Babironiapi jicani, jicani! –najari. –Najaro odsa huapimacca madijajinepi dsama huapimacca madija Diodsa huatideni ajamamanadsa Babironiadenicca huananehedsa toquejenaridsajari. Babironiadenipa Diodsa iboququiri nadsa poccadeni

ibohuepi dsama huapimacca madijadsa dsapa taridsajaro. Pina noccodeni janoququiri nahijine dsedse coma tanicca da icanabaquiqujarissa najaro –najari.

⁹Dsotode Diocca dodosse 3'cca toccamissadsa atti mohui tadsa huati tajari: –Bani siri jidsabotedsa, pohua corime nahatohuids madija huahuatidsemana najaridenipa Diocca najidsohue inahanamananitoahui. Bani siricca nanajano cajimanahijine iboraququiri nadsapa assaridenidsa cajimana, dsepedenidsa cajimana najaridenipa Diocca najidsohue inahanamananitoahui. ¹⁰Pohuadenidsa Dio huadidsapa najidsohue imeni najorajari. Diocca dodosse tabaqqui, Edede Bedi tedseje pohuadeni cattomama canahihuaji Dio nanajidso inanabaququirdsa jororoni *azufre quejemanicca inahanamananitoahui. ¹¹Najaridenipa bani siri jidsabotedsa, pohua corime nahatohuids huahuatidsemana najari. Bani siricca nanajano cajimana-jarahijine poni quina-jaradsa pohuadenipa dsippo jororoni jine ocasserani ahumanadsapa dsome, ssiaja, dsome, ssiaja jassi quina-jarahitohui –najari.

¹²Najaro ima tojadsapi Diocca madijacca ima ahuato tanitohui. Diocca madijapa oppinani ahahumana naraha Diocca dacorehema mohuaradsa ihinahanamana nanitohui. Najaridenipa Diocca dosseniji inapajiramananissa tajaro. Jesocristodsa naco disseraququiri najari.

¹³Nadsapa memehuaji atti omittajaro. Ohuadsa ajama najari: –Ajijaro ima bicani dsodo taji –najari. –Aji jidapanaccadsama

ia Medsede Jesocristodsa toquejena-jarideni jicamanapodsapa pohuadenidsa ima bicani tojanitohui –najari.

Nadsapa Dio Corime attipa: –Jehe, najarideni tojicadsapa jassi quinahitohui. Najo tаница dsepedeni ihijimana najaro jicani. Aja Diodsa dsepedeni ijimanadsa pohuadenijine ima bicani tojajaroma memehuaji jai tojamacossahitohui –najari.

**Namihujicca bono
naccadecca ima**

¹⁴Nadsapi ocattoma cana-neje meme essení nopo tani qqui onajaro. Najaro essení tetepidsa huittarijaripa pina madijassa naha qqui onajari. Pohua tatidsa tamine taticca oro nahatoni huittarijaro. Pohua dsepedsa massito jocacadsani jadsira tocanehe dsojo icajidsajaro.

¹⁵Diocca dodosse ohuaha Diodsa dada toquimahuaji qquenajari. Pohuapa aja meme essení noponi tetepidsa huittarijaridsa jadsirema huati tajari: –Ticca massito jocacadsanidsa bono huissi tippiridsajo. Jidapanana dsama huapimacca bono jadabote tojahi, naccahi bica tahi –najari. ¹⁶Nadsapa dsotode meme essení noponi tetepidsa huittarijaripa nami tetepidsa pocca massito da icanadsa bono tajoppiridsadsapa inaccajari.

¹⁷Nadsapa Diocca dodosse ohuaha memehujicca Diodsa dada toquimahuaji qquenajari. Najari naco dsepedsa massito jocacadsani jadsira tocanehe dsojo icajidsajaro.

¹⁸Nadsapa memehujicca Diodsa da tahijinecca huahuanari cahittari-nihuaji Diocca dodosse ohuaha

naco qquenajari. Pohuapa dsippo jororoni jinede. Nadsapa aja massito jocacadsani jadsira tocanehe dsojo tocajidsajaridsa atti mohui tadsa huati tajari: –Namicca ppa nahi uva bono jadabote tojahi. Ticca massito jocacadsani jadsira tocanajarodsa uva dsepema namanaha huissi tippiridsadsa tinaccaridsajo –najari.

¹⁹Nadsapa Diocca dodosse nami tetepidsa pocca massito da icanadsa namicca uva bono huapima tajoppiridsadsapa inaccajari. Nadsapa uva ppejene tojahijine siba odini imenibotedsa hua idsajari. Nahidsa uva ttai ttai najaricca imapi Diocca huadie madijadsa tojanijinecca ima. ²⁰Nadsapa odsa panani huapihuaji uva ttai ttai nadsa ppejene toccajari. Najari ppejene toccajaripa madija emenedeni uva ttaittadsa qquenajaro. Pina hueni tocadsajajarissa najaro. Bojo huahi dequeraraha ajaridsa bacco tajaro. (Najaropi 1 metro y medio.) Emenedeni toccabaquini huaji tani. Nattome inadsapi 300 kilometrossa nehe tojajaro.

**Diocca dodosse
tabaqqi 7 quinajari Dio
icadossebaqquidsá najidsohue
7 najaro najoramanajari**

15 ¹Memehuaji qqui onaneje itedsejemacca ima onihi denima jidsa tehe ahuatoni qqui onadsapi huajo onajaro. Diocca dodosse tabaqqi 7 quinaha ahuatomanajaripa najidsohue oppina tаница 7 nehe madijadsa tojaridsanijine najoramanajari. Najaro najidsohuepi jicanicca. Nidsa najaro najidsohue 7 nehe tojaridsani nattinipi Diocca huadie jicanitohui.

²Nadsapi coridsa imenissa najaro naqui qqui onajaro. Pina siba cristaossa najaro tocassiejqquimera naraha jororoni quejemajaro. Nani coridsassa najarodsa madija domodeni huarijaripa Diocca daniji titire oni arpa dsojo dsojo tojidseri najari. Najaridenipa bani siri jidsa-botecca imadsa dsori tocaniredsa deni toquejenajari. Bani siri jidsa-botedsa pohua corimedsa naco jehe quina-jarajari. Pohua onicca numero pohuadenidsa nohuerani.

³Nadsapa titire arpadsa tire tire quinadsapa Diocca medse Moisesicca ajie, Edede Bedi Jesocca ajie jiri jiri quinajari. Ajiepi ajima canajaro:

– Jehe Abi Dio, nahatojide tijirani.

Tinahatoridsajari huapimapa bica tahi.

Tiapi ia Medsede dacorabote tijani.

Ticca cacahuehepi toccanissa tani.

Ticca ima huapimapi pajissehe ponira.

Dsama nemanehedsa madiridsamanajarideni cacahuade ojari tajaro.

⁴Jehe ia Medsede Dio, nidsa huapima tinoppine cappinadiridsamanahitohui.

Huapimapa Tiadsa: “Bica tinani, deni tijani” quinahitohui.

Tiana ojari tani. Tibodi ssiaja, huire tani.

Ticca ima pajiranissa tajaro qqui toquinadsapa dsama nemanehedsa madiridsamanajarideni Tiadsa huatidsemanahijine jahijonana canahitohui –quinajari, jiri jiri quinadsa.

⁵Najaro poccadeni ajie jicadsa ocattoma cananeje memehuaajicca Diodsa dada toqquima bodihuaji tohuabajaro. ⁶Najaro Diodsa dada toqquima bodihuaji Diocca dodosse tabaqqui 7 quinaha jai tojenajari. Pohuadenipa najidsohue oppina tanicca 7 najaro cacahuadedeni. Etero onini lino bica tajaro, nopo, dsibehi tajaro huedsamanajari. Ssoquerideni orocca biji metedenidsa bacco tajaro.

⁷Nadsapa camittaquiri najari 4 quinajarideni ojariapa Diocca dodosse tabaqqui 7 quinajaridenidsa tasao orocca pohuadenidsa da icanaridsajari. Najari tasaodsapi Dio camitta taha madi-dsanapojaricca huadie tojaridsanijine najidsohue comabote ijiridsajaro.

⁸Nadsapi memehuaajicca Diodsa dada toqquima bodihuajipi Djoline pocca deni tojehe, pocca dacorehe ahuato inanajaro. Pina dsippo essenissa najaro ijiridsajaro. Nanihuajipi toqquedsimade ssamo taccani. Aja tasao 7 canajaricca najidsohue comabote tojaridsanijine namihuaji Diocca dodosse tabaqqui 7 quinajari sso inaronamanehe jicadsana toqquedsimade toppinera-nitohui.

Tasao 7 canajaridsa najidsohue ijiridsanicca ima

16 ¹Nadsapa Diodsa dada toqquima bodihuaji atti mohui dacoraha omittajaro. Pocca dodosse tabaqquidsua huati tajari: –¡Jari, jai tijaji! Jidapanana ojine ticcadeni tasaodsa najidsohue oppina tanicca ijiridsajarodsa onajidsobaqquihijine namihuaji sso tinaronaridsamanaji –najari.

²Nadsapa Diocca dodosse tahidecca toccajari, pocca tasaocca namihuaji sso inaronajaro. Nadsapa namihuaji madija huapima bani siri jidsabote janoma jahiridsajari pohua corime nahatohuidsa: –Ia cacahuade –quiquinanajaridenipa joro jadsidsi comene dacorahicca inahanamanajari.

³Nadsapa Diocca dodosse dsotodecca naco pocca tasaocca passo imenihuaji sso inaronajaro. Nadsapi passo tohuemene tojajaro. Pina madija pohua tessejine dsoqquedsa emene toccabaqquijarossa najaro. Nadsapa passo abari huapima cacotaridsajari.

⁴Dsotode Diocca dodosse 3'cca naco pocca tasaocca sso inarona-dsapi huenicca passo, bijinicca passo, sibadsa qquenajarocca passo naqui tohuemene tojaridsajaro. ⁵Nadsapa Diocca dodosse passo cacahuade atti omittadsapi ajama najari:

–Jehe ohua Medsede Dio,
tibodipi ssiaja, huire tajaro.
Jidapana naqui timadini, Tiapi
dsama tinahato-jeraccadsama
timadipojaro.

Madija tinajidsobaqquidsapa
tijine pajiranissa tani.

⁶Pohuadenijine ticca madija
Tiadsa bicaqquri najarideni
jicaridsajari.

Tetti cacomeraqquri najarideni
naco inajicaridsa-manadsapa
emenedeni toccaridsajaro.

Jidapapa manaco tohuemene
dse quinahijine pohuadenidsa
da tinajaro.

Najaropi poccadeni ima
manaconi –najari.

⁷Nadsapi Diodsa da tahijinecca
huahuanarihuaji tohuatti mohuini

qquenani omittajaropi ajima najaro:
–Jehe ohua Medsede, Tiapi Dio
Dacorabote, ticca pajissehema
poccadeni ima nattome tadsapi
tijine pajiranissa tanitohui –nade
tohuatti mohuini.

⁸Diocca dodosse 4'cca naco pocca
tasaocca majidsa sso inarijaro.
Nadsapa maji icadossejari, pohua
ppocone dacoradsa madija camana-
hijine. ⁹Madija huapima camanahi-
ssa taraha Diodsa bodideni cacaji-
qquimera-jarahi. Puhuadsa: –Deni
tijani, nahatojide tijirani –quina-
jarahi. Najidsohue comabote pepeje
inananijine Dio pajiraraha Pohua
onidsa tatamasso quinajari.

¹⁰Nadsapa Diocca dodosse 5'cca
naco pocca tasaocca bani siri
dossedse tojahijinecca huihuittari-
dsa sso inaridsapi pocca cacahuete
nemanehetodsidsijaro. Nadsapa
pohuadenidsa comani dacoradsa
pohuadeni ipoma inodeni dsauqi
tocanamanajari. ¹¹Comaqquri
naraha poccadeni tabaccorehe
nebomana-jarajari. Imedeni jadsi-
jaro comani ahuamanadsapa Dio
memehuaji madijaridsa tatamasso
quinajari.

¹²Nadsapa Diocca dodosse 6'cca
naco pocca tasaocca hueni imehi
Eoparatedsa sso inaronadsapi sse
tocanajari. Tada tocanadsapa maji
ccajonahihujicca taminedeni
poccadeni madijama jahiquima-
hijine pajiramanajari.

¹³Nadsapi ocattoma cananaja
huama imehibote ajaridsa qquenahi
qqui, bani siri jidsabote ajaridsa
qquenahi qqui, bani siri ohuaha
maidsehe mamaride ajaridsa
qquenahi qqui onajaripa tocorime
siri 3 quinaha pina torocacassa

naha qquenaridsajari. ¹⁴Najari-denipa Satanacca dodosse tabaqquideni. Pohuadenipa canahatorimana canajari. Dsama huapimacca taminedeni madiridsamanahihuaji jai tojabaqqujari, jadsiretohui inequeriqqui-baqquimanageridsahijine. Diocca huadie imeni tojaridsanijinecca huada baccotadsapi taminedeni poccadeni soldadodenima Diodsa jadsire inamananijine. Najaro huadadsa Dio Dacorabote deni tojahitohui.

¹⁵Najaro imapi Jesocristo ia maritocanabaqquidsa ajama napode: –Pina ticca odsadsa bobotide qqedsimahijinecca huada ssamoqquri tiquinajarossa nanitohui. Ohua occanipomanicca huada ssamoqquri tiquinani. Nadsapi tibodideni huatomananissa tadsa tiadeni tecahuaridsamanaji. Pina ticcadeni eteroma tinoccodeni barijarossa tiquinaji. Nema tiquinadsapi ima bicani ticajimananitohui. Naraha otohui timadimana-jeradsa occanipomadsapi pina madija ccoroje cappinajarissa tiquinanitohui –nade.

¹⁶Nadsama Satanacca dodosse tabaqquidenipa ajijaro dsamacca taminedeni huapima poccadeni madijama inequeriqquimanajari. Aja inequeriqquimanahihuajicca dsama onini jodiodeni atti ebreodsapi: Aramajedo, quinajari. ¹⁷Nadsapa Diocca dodosse 7 quinajari jicahicca pocca tasocca jappopponihuaji sso inajaro. Nadsapi memehuaajicca Diodsa dada toqquimahuaji atti mohui ahuatojaro. Nahi Diocca huihuittari bicabote cahittarinihuaji pohua atti mohui tehe qquenajaropi:

–¡Jidapapi jicani! –najari.

¹⁸Nadsapi ssissiede ssiehe canajaro. Mohuini jidsa tajaro naqui tomohuiridsajaro. Ttottorode naqui ttororo canajaro. Nadsapi nami jadsirema dsa dsa najaro. Madija ajijaro dsamadsa madimanapodsama namidsadsa caji taporaha ajijaro namidsadsapi denima dacorajaro. ¹⁹Nadsapi namidsadsa dacorajarojine odsa panani deni tojanicca Babironia nocconidsa huacca nadsapi arobeni 3 nehe tojajaro. Dsama onih onih naridsajarocca odsa panani naqui tohuedimaridsajaro. Diopa Babironiacca ima huati ajama-jaradsa pocca najidsohue dacorajaro ponidsa inanajaro. Pocca huadie poni dse inanajarossa najaro. ²⁰Passo imenidsa dsama huihuittidsacossieri najaro, ssono huapima naqui amossi naridsajaro. ²¹Nadsapi memehuaajicca passo ccara tojani pina sibassa najaro naqui catojaronajaro. Bedeni jerani, pina 40 kilossa najaro. Najaropi madijadsa catojariridsajaro. Nadsapa Diodsa tatamasso quinajari, najaro najidsohue pohuadenidsa oppina tadsa.

**Amoneje huananehe
imene cajijaropi Diocca
najidsohuedsa tojanitohui**

17 ¹Nadsapa Diocca dodosse tabaqqui 7 quinajari tasao cajimanajarideni ojariapa ohuahuaaji ccajonadsa huati tajari: –Nija, ticcajonaji. Tiadsa ima ahuato onanana –najari. –Aji amoneje passo tetepidsa huittaritaropi huananari. Ponicca imasiri manaconi Dio inajidsonicca ima qqui tinanijine –najari. ² –Jehe,

dsama huapimacca tamedenedi poccadeni madijama ponicca huananehedsa toquejenaridsajari. Pina noccodeni janoqquri nahijine dsedse coma tanicca dse naridsamanajarissa najaro –najari. (Ponicca huananehecca imapi: Diosda huatideni ajamamanadsa dio pohuamaccadsa huahuatidsemana najari.)

³Nadsapa Dio Corime itedsejemacca ima ohua qqui tonanajari. Dsama huamoni ssono caji, siba caji tanihuaji Diocca dodosse ohua tohuaccajari. Nadsapi nanihuaji qqui onaneje bani siri maccohuidsa amoneje huittarini qqui onajaro. Bani siripa tati 7, ori 10 najari. Pohua huapidsa dsodo nani ijijaro. Najaro dsodo nanipi oppina tani, Diosda tabaccora tajaro. ⁴Bani siri idedsa huittarijaropi etero bicani sohueni macconi quejemani huedsajaro. Mattonicca, huaribonicca, bijinicca, issonicca huapima oro nahatoni cajijaro. Siba bedeni bicabote, *perla no poni oro tadsajani quejemani cajidsamaro canajaro. Poni dsapanidsa dsedse oro nahatoni dsojo tojidsajaro. Ponicca dsedsedsa ijijaripa ponicca huananehecca ima. Diosda ima oppina tanicca, tabaccora tanicca ijinnissa tajaro. (Najaro imapi ponicca tabaccorehe, dio pohuamaccadsa huatidsejarocca ima.) ⁵Assarinicca dsodo nanipi imittanijine ssamo inaccani. Najaropi ajima najaro: Odsa panani imeni Babironiapi huananehe jinede. Ponicca marinajajine ibohue, tabaccorehe tojaridsadsapi dsama huapimadsa ima tohuajari nadsithe tojaridsajaro. ⁶Qqui onadsapi

obodidsa nahato onajaro: Ponipi nocconi jano tajaro. Diocca madija emenedeni, Jesocristo tahimari ecomeramanadsa inajicaridsamanajari emenedeni naqui dse nadsapi nocconi jano tajaro.

Najaro ima qqui onadsapi ojabojo najaro. ⁷Nadsapa Diocca dodosse ohuadsa huati tajari: –¿Nejeco-tohui tijabojo najaro? Aji amonejecca ima ahuatora taraha tia onahattana. Aja bani siri tati 7, ori 10 najari pohua idedsa amoneje huittaridsa eccaridsajarocca ima naqui ahuatora taraha tia onahattana –najari. ⁸ –Aja bani siri qqui tinajaripa tahide madiporaha jidapapa pocca ima jicani. Naraha pohuapa nidsa *nami odini huaji taniccadsa qqenahi ojarihitohui. Qquenahi nattipa coridsa imeni jororo cananihuaji pohua dsoqquehicca ima inahandsanapohitohui. Nadsapa ajijaro dsamacca madija tahide dsama nahatoponidsama *camittehe cajimana-dsanapohuijinecca papeodsanideni nohuerajarideni bani siri qqui toquinadsapa bodideni jabojo quinahitohui. Najari bani siripa madipojari, jidapapa madi-jarahi, nidsa dsotode canajoranipomadsa madija inajabojobaqquihitohui –najari Diocca dodosse ohuadsa. ⁹Nadsapa denima huati huati tajari: –Ajijaro ima timittanissa tanijine najo tani. Diocca tohuattehe cajijarina mittahitohui –najari. –Aja bani siri tati 7 najaricca imapi ssono 7 najarodsamoneje huittarijaro. Tati 7 najaricca ima onihi naqui tamine 7 quinajari. ¹⁰Najari tamedenedi mota 5 quinajaridenicca cacahuehepi

jicapojaro. Ohuahapa jidapana dsama cacahuade tojaccahi. Ohuahapa nidsa dsotode dsama cacahuade tojahitohui. Naraha najari tamine dsama ecahuaridsa dsapi huajano huapi tajarahitohui. ¹¹Bani siri tahide madiporaha jidapana nohueraccajaripa tamine 8'cca tojahitohui. (Caria attidsapi: octavo, quinajari.) Tamine 7 quina-jaridenidsa quejemaporaha nidsa dsotode tamine 8'cca tojadsapa coridsa imeni jororo cananihuaji pohua dsoquehicca ima inahana-dsanaponitohui.

¹² –Bani siri ori 10 naha qqui tinapojaripa tamine 10 quinajari-cca ima. Najaridenicca cacahuehepi nohueraccani. Nidsa dsotode bani siri tedseje dossehe cajimanadsapa maji ojariara dossede toquejena-hitohui. ¹³Nadsapa tamine 10 quinajarideni poccadeni dacorehe, poccadeni cacahuehepi bani siri-dsa inanamananjine jehe canirere canahitohui. ¹⁴Najaridenina poccadeni madijama Edede Bedidsa jadsire imeni inanamananitohui. Naraha Edede Bedipa dacorehe deni tojanicca cajijarijine inajicahitohui. Pohuadsa toquejenaridenipa Dio icattejidsa-baqqijari. Pohuadsa disseraqqiri najari. Tamine huapi taraha Edede Bedi Jesopa huapimac-ca tamine deni tojahicca ojarijari. Madija medse totonanadedeni naco huapi taraha pohuapa huapima Medsededeni deni tojajari –najari.

¹⁵Nadsapa Diocca dodosse denima ohua mari canajari. Pohua attipa: –Aji passo qqui tinajaro tetepidsa amoneje huananari huittari cana-jarocca imapi madija huapideni onihi onihi cajiridsamanajarideni,

madija ohuaha ohuaha naridsa-manajarideni, tohuatti onihi onihi cajiridsamanajarideni, dsama onihi onihidsa madiridsamanajaridenicca ima najaro. ¹⁶Nadsama bani siripa pohua ori tamine 10 quinajarideni tedseje amoneje huananari ettajo-mananitohui. Ponicca etero ssiti quinadsapi ccorojani inebomananitohui. Poni imani naqui jipamanahitohui, dsippodsa coro idsanamana-dsapi ono tojanitohui. ¹⁷Tamine 10 quinajaripa ssamoqqiri naraha Dio Pohua jipa tahicca inanamananjine, bodideni inanajorabaqqijari. Pohuadenipa: “Bani sirina deni tojahi ojari nana” quinadsa jehe canirere canajari. Nadsapa bani siridsara iboraqqiri dsanapomanajaria Dio Pohua huati tapojaricca ima jicani bacco toquinahitohui. ¹⁸Nadsama amoneje huananari qqui tinajaropi odsa panani imenicca ima. Najaro odsa pananipi dsama onihi onihi naridsajarocca taminedenidsa dossede tojajaro –najari Diocca dodosse ohuadsa.

Odsa panani imeni Babironia jicanissa tajaro tahimarini

18 ¹Ima qqui onapojaro jica-dsapi Diocca dodosse ohuaha memehuaji ccaronahi qqui onajari. Dossehe dacoranicca cajijari. Pohua dsibehinejinepi nami huapima tossiajabaqqijaro. ²Nadsapa pohua atti mohui dacoradsa huahua najari:

–¡Babironia jicani, jicani!
–najari. –Babironia odsa panani deni tojanicca jicani. Jidapapa Babironiadsa Satanacca dodosse tabaqqi tocorimedenira madimanahi.

- Abaridsa, mori, eppe cajihi
oppina tahicca huapima
madimanahi.
Bani siri huadi tahicca naco
madimanahi.
- ³ Aji Babironia jicajaropi dsama
huapimacca madija ponicca
huananehedsa toquejena-
ridsajari.
Noccodeni janoqquri nahijine
dsedse coma tanicca dse
inanaridsa-baqqujarissa najaro.
Dsama huapimacca tamine
Diodsa iboqquri najarideni
ponicca huananehedsa
toquejenajari.
Ponicca madija todsepetaji
bicabote tohui disseraqquri,
jijipa huaticcara tahicca tohui
disseraqquri najarijine
dsama huapimacca dadadedeni
Babironiadsa pohuadeni
dsepetaji da da quinadsapa
dsiniro tosseridsamanajari.
Najaro ima huapimajine
Babironia jicajaro
—najari Diocca dodosse atti.
- ⁴ Nadsapi memehuaji atti onih
omittadsapi ajima najaro:
—Occa madija Babironiadsa
timadimanajaropi ponicca
imasiridsa tiquejemamana-
jeranijine jai tijenaji.
Babironiadsa najidsohue
ssonarinitohui.
Najaro najidsohue dsori tica-
nirenijine huajiji tinaji.
- ⁵ Babironiacca madija imasiri
inanamanapojaropi inehema-
manajaro.
Pina ssono dequerajaro memeh-
huaji bacco tajarossa najaro.
Poccadeni ima tabaccora tajaro
Dio huati ajama-jarajari.
- ⁶ Babironiapi madija inajidso-
baqqujari manaco ponidsa
najarossa nehe tojanitohui.
Pina ponijinessa nehe denima
oppina tehe tinanamanaji.
Madijadsa imasiri inanaridsa-
jaropi pina dsedse bidabote
dse inanabaqqujarissa najaro.
Manaco ponidsa denima oppina
tehe dse tinanamanaji.
- ⁷ Coma tanijine tinajidsomanaji.
Ponipi: “Ohuapi deni ojani”
naneje najaro.
Poni dsapanitaji bicabote
tohuini disseraqquri
dsanapomanajari manacopa
ponidsa comani imeni
tinanamana-dsanapoji.
Poni bodinidsa: “Ohuapi ajidsa
omadijaro, tamine deni
tojanicca ojajaro.
Tabira ocaja-jerani. Nanajidso
ojajeranitohui” najaro.
- ⁸ Poni attini nema nadsapi Dio
Dacorabote attia: “Babironia
onajicana” nadsapa ponidsa
najidsohue imeni amadsati
ssonarinitohui.
Ponicca madija huapi taha
comabotedsa cacotaridsa-
hitohui.
Motapa ocasserani ahuamana-
hitohui. Motapa pemimana-
hitohui.
Nadsapi Babironia diji tehe
jicanissa tanitohui
—najari Diocca dodosse.
- ⁹ Nidsa dsama huapimacca tamine,
aja Babironiacca huananehe-
dsa toquejenajari, pohuadeni
tohuini quinahiccadsa toquejena-
jari huapimapa odsa panani diji
tadsa essenitoccamacossani qq
toquinadsapa oji oji quinahitohui.

Pohuadenipa ponitohui oji oji
quinahitohui. ¹⁰Pohuadenipa
Babironiadsa najidsohue ssonari-
jaro noppineni cappinamanadsapa
huajima cattomama canahitohui.
Pohuadeni attipa:

– ¡Jaho! Babironia tiapi icca
odsa panani deni tojanicca
dacorabote tijaraha
amadsati ticca imasiri mana-
coni najidsohue tiadsa bacco
tajaro –quinahitohui.

¹¹Nadsapa dsama huapimacca
dadadedeni naco pohuadeni dsepe-
taji mittade nohueradsapa ponitohui
oji oji quinahitohui. ¹²Nadsama
Babironia bica taccadsa pohuadeni
dsepetaji eheccajonamana najaropi
oro, plata, siba bedeni huatini ccara
tanicca, onihipi perla noponi bica-
bote, etero bicani onihi onihi nehe
pina lino, seda, macconi purpura,
denima macco tajaro naqui ehecca-
jonamana najaro. Ahua majoni
bicabote cajinicca, elefante ino
nahatohui, ahua huatini ccara
tanicca nahatoni, ppejo onini
bronze nahatoni, ppejo onini hierro
nahatoni, siba sseque tajaro onini
marmol nahatoni naqui ehecca-
jonamana najaro. ¹³Dsamatapa
quequejema canela, dsamatapa
quequejema majo tahicca ohuaha
ohuaha naco huemahi ehecca-
jonamana najari. Ahua majiconi
tohuessidsa majo bica tajari, ahua
onihi majiconi mirra eheccajona-
mana najari. Majojo, uva ppejene,
ahua bono oribo oquine, harina
nappori tahicca, aroso jidsadsa
trigo naco eheccajonamana najari.
Bohui, bojo todsepetaji jojorede,
edede, bojo madija jojorede, nami
jojoppade bojo joca joca ihicana

najaro, madija naco ibotibaquui-
manadsa manaconedenitohui
da quinahijine eheccajonamana
najari. ¹⁴Naraha Babironia jicadsapi
dadadedeni ponidsa ajama quina-
hitohui:

– Jidapapi ahua bono ocassa-
bote tohuini tanicca ticappira-
nissa tani.

Aji tia ticajjarocca huapima
bicabote paji jicarihe nema
dsanaponitohui –quina-
hitohui.

¹⁵Nadsapa dadadedeni Babironiadsa
pohuadeni dsedetaji da da quinapo-
dsa dsiniro ssequiri napojaridenipa
ponidsa najidsohue oppina tehe
ssonarijaro noppineni cappina-
manahitohui. Nadsapa huaji tanidsa
domo huadsa oji oji quinahitohui.

¹⁶Pohuadeni atti ajama quina-
hitohui:

– Jaho, Babironiapi odsa
panani deni tojaniccaraha
jicajaro. Tohuati nahana tani.

Najaro odsa pananipi pina
amoneje poni nabicajarrocca
imassa najaro.

Etero bicabote lino huedsa,
onihi purpura huedsa, onihi
macconi huedsa najaro.

Poni nehebedsodsapi oro,
siba bedeni dsibehi tajaro,
perla naqui mattonidsa,
huaribonidsa, bijinidsa,
issonidsa cajijaro.

¹⁷Jehe poni bodini huato-jeraraha
amadsati najidsohue bacco
tajaro.

Ponicca dsiniro jica, bicabote
jica najaro –quinahitohui
dadadedeni.

Nadsapa canoa imenibote
jinededeni, pohuadenidsa

jahijonarideni, canoa imeni
 ahaccadedeni, passo imenuhaji
 tatarabadsadedeni huapimapa
 huajima cattomama canahitohui.
¹⁸ Babironia diji tani essenitocca-
 macossani qqui toquinadsa johua
 johua quinahitohui. Pohuadeni
 attipa: –¡Odsa panani deni tojani-
 cca najarossa najaro nohue-
 rani, nohuerani! –quinahitohui.
¹⁹ Nadsapa ojiejine ocasserani ahua-
 manahi ahuato tanijine pohuadeni
 tatidsa sssiqui huira narimanadsa
 jadsirema oji oji quinahitohui. Oji
 quinadsa attidenipa:
 –¡Jaho, Babironiapi deni toja-
 niccaraha tohuati nahana
 tani!
 Babironiadsapa dsiniro
 ssequiri naha madimanajari.
 Pohuadenijine passo imenicca
 canoa imeni jinededeni dsiniro
 huemani cajiridsamanajari.
 Naraha huada ojarie amadsati
 jicani –quinahitohui.
²⁰ ¡Nadsapi memehuari timadimana-
 jardenipi ajijaro odsa panani
 jicajarodsa tetidsemanaji!
 Jesocristocca dodosse tabaqqui,
 Dio Atti cacomeraqqui
 najarideni, Diodsa tiquejenaja-
 rodeni huapima tetidsemanaji.
 Ponijine nanajidso tiquejena-
 ridsapojaro manaconi
 jidapanana Dio inajidsojaro.
²¹ Nadsapa Diocca dodosse dacora-
 botepa siba imeni idimacossa
 najaro. Najaro sibapi imenibote pina
 aroso jidsadsa trigo ririassa najaro.
 Najaro siba imeni passo imenidsa
 coro idsippadsa pohua attipa:
 –Babironia tiapi odsa panani
 deni tijaniccaraha ajijaro
 sibassa tanitohui.

Paji amossi taridsapi tia qqui
 quinapoma-jeranitohui
 –najari.

²² –Nadsama ticca jahui huapi-
 madsapi titire oni arpa mohui
 todidi, totore mohuini todidi,
 jeijeje mohui todidi nadsapa
 madija mittamanapoma-
 jarahitohui.

Ticca tatarabadsadedeni naco
 amossihuajahitohui.

Trigo riria mohuini naqui todidi
 nanitohui.

²³ Tiadsa jojororo ssiejene naco
 nohuerahitohui.

Cacajirehicca ejete mohuini
 nohueranitohui.

Ticca todsepetaji dadadedeni
 dsama huapimadsa deni
 toquejenaraha jicanitohui.

Tiapi dsama huapimacca madija
 ticamaidsabaqqui-ridsajaripa
 pina dsoppineje madija
 icamaidsabaqquijarissa
 tajarojine paji amossi
 tarinitohui –najari.

²⁴ Jehe, najaro odsa pananidsapi
 Dio Atti cacomeraqqui najarideni
 inajicaridsamanajari. Diocca madija
 toquejenarideni naco inajicaridsa-
 manajari. Aja dsama huapimacca
 madija ijinedeni ahumanadsa
 emenedeni toccaridsajarojine
 Babironiadsa Diocca najidsohue
 ssonarijaro.

Memehuari huatidsehe tojaridsajaro

19 ¹ Nadsapi Babironia diji tehe
 jicani nattinipi memehuari
 madija huapima attideni mohui
 tehe omittajaro. Pohuadeni attipa:
 –¡Areroia, ia Medsede Diopa bica
 tahi! Pohuapa tossiejehe jinede.

Ima huapimadsa deni tojajari.
Pohuana denima dacorahi
ojarijari.

²Diopa pajisschedsa ima nattome
inadsapi Pohuajine pajiranissa
tajaro.

Babironiaccia huananehe dsama
huapimadsa dsapa taridsajaro
manaconipi ponidsa
ssonarinitohui.

Ponijine Diocca medse emene-
deni toccaridsajari manacone-
deni naco najidsouhe oppina
tajarods Dio inajicajaro
–quinajari.

³Nadsapa huati toquinapomajari:
–¡Areroia, ia Medsede Diopa
bica tahi!

Babironiapi diji tehe jicaraha
esseni toccamacossanipi
nebo-jeranitohui –quinajari.

⁴Nadsapa cacahuadedeni 24
quinajari, camittehe cajimana-
jari 4 quinajarideni tedseje Diocca
huihuittari bicabote tadsajanima
pohuadeni baccohuaji domodeni
pona nadsa Diodsa huatidsemana-
jari. Pohuadeni attipa:

–¡Pajissa nema nana! ¡Areroia,
ia Medsede Diopa bica tahi!
–quinajari.

⁵Nadsapa Diocca huihuittari bica-
bote cahittarinihuaji tohuatti
omittajaropi ajima najaro:

–Huapima Pohuadsa medse
tiquejenajaro icca Diodsa jiri
jiri tiquinaji.

Huapima Pohuadsa tidsepedeni
ijjaro,

Pohua noppine cappinaquiri
tiquinajaro, aji deni tiquejena-
jarodeni, ajimani tiquejena-
jarodeni naqui

Diodsa jiri jiri tiquinaji –najari.

Edede Bedi cacajirehicca ejete

⁶Nadsapi memehujicca madija
huapima attideni mohuini omitta-
neje bica tajaro, pina hueni ssahaha
canajarossa najaro. Mohuini onihi
naqui pina ttottorode mohuini
dacorajarossa najaro. Attidenipa:

–¡Areroia, Ia Medsede Dio
dacorabotepa deni tojahi!

Jidapana huapima
ecahuabaquihijine pocca
cacahuehe bacco tani.

⁷¡Etidseña, etidseri nana!

Diodsa: “Deni tijani, bica
tinani” inana.

Jidapanana Edede Bedi
cacajirehicca huada bacco
tani.

Pocca amoneje tojanijinepi
najorani.

(Najaropi pocca madija
najoramanajari, pohuadsa
madimanahijine.)

⁸Etero huedsadsa najoranijinepi
ponidsa etero onini lino bica
tajaro, nope, dsibehi tajaro
da inajaro.

Najaro etero bicanicca
imapi Diocca madija
toquejenajarideni bodideni
inahirebaquidsa Pohuadsa
madimanahissa tajari
–quinajari.

⁹Nadsapa Diocca dodosse ohuadsa
huati tajari: –Dsodo taji: Edede
Bedi Jesopa pocca madijadsa
huahua najari, pocca cajicajicca
jipaquiedsa jai tojedsimahijine.
Jai tojedsimajaridenipa huatidsehe
imeni cajimanahitohui –najari.
Nadsapa denima huati tajari: –Aji
huati huati onajaropi Dio Atti
pajissacca –najari.

¹⁰Nadsapi Diocca dodosse bacco-huaji opitodsa ohuitta nadsa pohuadsa ohuatidsenijneraha ohuadsa huati tajari: – Ohuadsa nema tejeraji. Ohua naqui Diocca medse ojani. Pina tia timecotedeni tedseje Jesocristo tahimaridsa disseraqquri tiquinajarossa onani. Diodsara tetidseje – najari.

Aji Jesocristo tahimari bica-botepi Dio Pohua Atti cacomeraqquri najaridenidsa inanadsana ehecomeramana najonajaropaji.

**Bojo nopohuidsa
huittaritaricca ima**

¹¹Nadsapi qqui onaneje meme tohuabadsa bojo nopohui ahuatojari. Najari bojodsa huittaritaripa Pajissehe Jinede. Pohuapa maidsera tajari. Dsama ecahuadsa, jadsire inanadsa naqui pohuajine pajirani-ssa tajaro. ¹²Pohua nocco dsibehi tajaro. Pina dsippo jororonissa najaro. Pohua tatidsapa tamine tatidenicca huapi taha tassaqquidsa huittaritari. Pohua oni dsodo nani cajiraha pohua motta nahato tahi ojari najari. ¹³Pocca eteropi tohuemenedsa ibedsippani macco tajaro huedsajari. Pohua onipa Dio Atti. ¹⁴Pocca madija memehuajicca jajadsirededeni pohua natti jai tojamissajari. Poccadeni etero onini lino bica tajaro, nopo, obero tajaro huedsamanadsa bojo nopohuidsa huihuittariri naridsajari. ¹⁵Pohua ajaridsa qqenajaropi pina massito cajadsire-qqumerajarossa najaro. Najarodsa dsama huapimacca madija inajidsoridsa-baqquihijine. Dsama huapimacca tamine dacorbote tojadsapa pohua atti dacoradsa madija dosse dosse nahitohui.

Pohuajinepa Dio Dacorabottecca huadie tojani qqui toquinahitohui. Pohuapa Diodsa iboqquri najarideni ttai idsanacossabaqquidsa mere huajahissa tahitohui. Pina uva ppejene toccahijine ttai ttai quinarissa nahitohui. ¹⁶Pocca eterodsa, pohua panaccodsa naqui dsodonanicca imapi: –Tamine huapi taraha Jesona tamine deni tojahi ojarihi. Medse cajimanahi huapi taraha Jesona ia Medsede deni tojahi ojarihi – najaro dsodo nani.

**Bojo nopohuidsa
huittaritaripa deni tojajari**

¹⁷Nadsapa qqui onanaja Diocca dodosse majidsa huarihi qqui onajari. Pohuapa meme abari banicca jipaqquri najari meme napicossanidsa jahiridsajaridenidsa jadsirema huahua najari: – ¡Nija, jai tijajonaji! Diocca jipaqque imenibotedsa tijipamananijine tiqueriqquimanaji – najari. ¹⁸ –Tijipamananijinepi tamine imedeni, soldadodenicca tamine imedeni, jadsirecca dacoraqquri najari imedeni, bojo imedeni, bojodsa huihuittaride imedeni, madijacca dodosse toquejena-jarajari imedeni, madijacca dodosse toquejenajari imedeni, ajamani toquejenajari imedeni, deni toquejenajari imedeni naco tijipamananitohui – najari.

¹⁹Nadsapa qqui onanaja bani siri jidsabote, dsama huapimacca taminedeni, poccadeni soldadodenima jadsire inanamananijine queriqquihi qqui onabaqquijari. Aja bojo nopohuidsa huittaritari-ssa ssonarimanahijine, pocca soldadodenidsa naco ssonarimanahijine najoramanaha domo

huajari. ²⁰ Cahadiredsapa bojo nopohuidsa huittarijarina pocca madija tedseje bani siri jidsabote dama quinajari. Bani siri ohuaha maidehe mamaride naco dama quinajari. Najaripa bani siri jidsabote tocattahihuaji canahatori canapojari. Najari naco madija icamaidsabaquidsapa bani siri jidsabote janodsa inajanoridsapojari. Najari pohuajine naco bani siri jidsabote corimedsa huatidsemanapojari. Nadsapa najari bani sirideni pamahapa camittaquiri naraha coridsa imeni *azufre jororo cananidsa cororo todsippajari. ²¹ Nadsapa bojudsa huittarijari pohua ajaricca massito cajadsirequimera najarodsa bani siricca soldadodeni inajicajari. Nadsapa meme abari madija imedeni jipamanadsa accaraquiri najari.

Huajano 1,000 nahicca ima

20 ¹ Nadsapa qqui onapomanaja Diocca dodosse nami odini huaji tanicca pipicoma ccaronajari. Cadena imehibote naco pohua dsepedsa dsojo inaronajari. ² Najari Diocca dodossepa huama imehibote dama inadsa jore inaqquijari, huajano 1,000 (mil) naha ccaridsa-jarahijine. Najari huama imehibotepa maittaccadsama pina maccassa naha ahuatopojari. (Najarina Adana Ebadeni icamaidsabaquipojari.) Pohua onipa *Satana, Diocca huadi najari. ³ Nadsapa *nami odini huaji tanihuaji coroidsimadsa noccobiji ecossanissa tajaro, qquena-jarahijine. Noccobiji huapihuaji modsassa najarodsa nepi inacossajaro. Nadsapa huajano 1,000 naha dsama huapimacca madija

icamaidsabaquijarahijine. Huajano 1,000 naha jicadsana tappa inadsapa huada pamehe ccaridsadsa madijadsa maidsa maidsa naridsapomacchitohui.

⁴ Qqui onanaja tamedenicca huihuittaridsa jassi tariridsajari qqui onabaquijari. Pohuadenipa ima icattemananijine Diocca dossehe cajimanajari. Nahidsa naco madija mattodeni ca ca tojidsamaneri napojarideni qqui onabaquijari. Najaridenipa Jeso-cristo tahimari nahatoquiri najarideni Dio Atti ecomera-ridsamana-jarojine inajicabaquijamanapojari. Pohuadenipa bani siri jidsabotedsa, pohua corimedsa naco huahuatidsemana najarade. Bani siricca nanajano assaridenidsa, dsepedenidsa cajimana-jarajari. Najarideni nahatonimanahi qqui onabaquijari. Nadsapa huajano 1,000 naha Cristo tedseje dsama huapima dossede toquejenaridsajari.

⁵ Ajjaropi madija tahide nahatonimanapojaridenicca ima. Naraha tojicapojarideni motapa nahatonimana-jaracchitohui. Huajano 1,000 naha jicadsana nahatonimanahitohui. ⁶ Madija nahatoni-manapojaridenidsa Diocca biquehe tojajaro. Pohuadeni bodi ssiajaquiri, huirequiri najari. *Dsoqqehe dsotodecca pohuadenidsa nohueranitohui. (Najaropi najidsohue jiquejericca tonahanamanadsanapo-jarahitohui.) Nadsapa Diodsa, Cristodsa dsepedeni ijimanahitohui. Diodsa huahuati toqqumade toquejena, dada toqqumade toquejena nahitohui. Huajano 1,000 naha Cristo tedseje dsama huapima dossede toquejenaridsahitohui.

**Diocca huadi Satana
nanajidso tojahicca ima**

⁷Satanapa huajano 1,000 naha odi huaji tani bodidsa huesdsaraha najari huajano jicadsapa tappa tadsa qqenahitohui. ⁸Qquenadsapa dsama onihi onihidsa madiridsa-manajarideni huapima ahuajicca, ahuajicca icamaidsa-baqquiridsa-hitohui. Najaridenidsa: Cohuajicca madijadeni, Macocahuajicca madijadeni quiquinanajari. Najarideni Satana inequeriquibaqqujari, jadsire inanamanijine. Huapi taja najari. Pina ssiqui potera tajaro hua inanijine ssamo tajarossa quinajari. ⁹Nadsapa jadsiretohui quinajarideni jahijonana canajari. Dsama nemanehedsa ijimanajari. Diocca madija madimanahihuaji ijihuajani-manajari. Diocca cattaniji pocca odsa panani bicabote denihuajina cottaja-huajanimanaha jica najari. Naraha jororoni pporabote Dio dosse inaronajaro. Jadsiretohui jahijonarideni diji tocanirea jicajari. ¹⁰Diocca huadi Satana madijadsa maidsa maidsa naridsapojari manaconipa coridsa imeni *azufre jororo cananihuaji coro todsippajari. Nahihuajipa bani siri jidsabote, bani siri ohuaha maidsehe mamaride tedseje cororo todsippapojari. Nahidsapa dsome, ssiaja, dsome, ssiaja ocasserani ahuamana-dsanapohuitohui.

**Diocca huihuittari bicabote
nopo tocanajarodsa ima
cattemade tojajari**

¹¹Nadsapa qqui onanaja pocca huihuittari bicabote nopo tocanajarodsa Dio huittarihi qqui

onajari. Nahidsa huittaridsa pohua tedsejemapi meme tohuatora-ra amossi, nami tohuatora-ra amossi nadsapi nohuerade. ¹²⁻¹³Ocattoma cananaja dsoqquemana-pojarideni Dio tedsejema domodeni huajari. Nahihuajipa deni toquejenajarideni domo hua, cappiramanajarideni domo hua najari. Aja passodsa je tocanirejarideni, dsamadsa jicajarideni, dsoqquemana-pojarideni huapima Diocca huihuittari bicabote tadsajanima domodeni huajari. Nadsapa dsoqquemana-pojarideni cca ima papeodsa dsodo napojaro itaboridsajaro. Aji pohuadenijine ima bicani inanaridsamanajaro, ima tabaccora tanicca inanaridsamanajaro naqui papeodsa dsodo naridsajarodsa ima cattemade tojajari. Nadsapi pina pohuadeni ima inanaridsamanajarossa nehe manaconi pohuadenidsa inajararo. Papeo onihi naqui itabojaro. Najaro papeopi madija *camittehe cajimana-dsanapohuijinecca. ¹⁴⁻¹⁵Madija pohuadeni oni camittehe cajimana-dsanapohuijinecca papeodsa nohueradsapa coridsa jororo cananidsa hua todsippajari. Dsoqqehe coridsa imeni jororo cananihuaji coro todsippajaro. Dsoqqehecca cacahuehe naqui coro todsippajaro. Najaro coridsa imeni jororo canajarocca imapi *dsoqqehe dsotodecca.

**Meme dsati, nami dsati
najaro tahimarini**

21 ¹Nadsapi qqui onapoma-neje meme dsati, nami dsati qqui onajaro. Aji tahidecca meme, nami najaropi amossi najaro. Passo imeni naqui amossi najaro. ²Dio

pocca odsa panani bicabote *Jerosare dsati qqui onade. Dio Pohua tedsejema memehuaaji ccaronade. Jerosarepi pina amoneje maqqui cajinijine najorajarossa najaro, bicaridsaponi nade. ³Nadsapi memehuaaji Deni tojahicca huihuittari bicabote cahittarinihuaji tohuatti mohui tehe omittajaro: –Jidapapa Dio madijadsa madihi. Pohuadendisa madi-dsanapohuitohui. Madija huapima Diocca cacahueheda toquejenahitohui. Diopa pohuadeni Cacahuade tojadsanapohuitohui. ⁴Pohuapa inocco ppajani sse inanitohui, denima oji inejeranijine. Iadsa Dio madidsapa dsoquehe nohue, oje nohue, ettima oji oji inajaro nohue, coma inajaro naqui nohueranitohui. Aji ima huapima namidsa caji tapojaropi jicanitohui –nade.

⁵Nadsapa aja Deni tojahicca huihuittaridsa huittari canajari Attipa: –Ohuapi huapima dsati onanaridsahi –nade. Pohua Atti onihi naqui: –Ajijaro ima dsodo taji. Ajijaro imapi pajissa. Imapi pina ajijarossa nehe tojanitohui –nade. ⁶Nadsapa ohuadsa huati tajari: –Ajijaro ima huati onajaropi tojanissa tehe jicani. Ohuapi Ohua. Ajijaro dsama nahatopo-jeradsama omadipojaro. Nidsa dsotode ajijaro dsama jicaraha Ohuapi omadi-dsanaponitohui. Madija bacco dsaridsapa passo camittehecca qquenajaro dse nahijine pohuadsa da onanitohui. Pohuadsa: Manaconi, onejeranitohui. ⁷Aji occa dacorehema timadimanadsa Ohuadsa jehe tiquinajaro tinebomana-jeradsapi jidacca huati huati onapojaro huapima tiadenidsa

tojaridsanitohui. Ohuapi ticcadeni Dio ojanitohui. Tiadenipi occa ejedeni tiquejenanitohui. ⁸Naraha Ohuadsa toquejena-jarajaridenipa najidsohue cajimanahitohui. Aja madija: “Jesocristopa ohua Idinide” quinahijine huatide cappinaqquri najari, madija Jesocristodsa pajissa quina-jarajarideni, ima tabaccora taniccadsa disseraqquri najarideni, madija pohua tesse nanadsoqquede dissera tajari najidsohue cajimanahitohui. Aja huananehecca disseraqquri najarideni, dsoppinejedeni, siba nahatonidsa huahuatidsemana najarideni, mamaidsadedeni naco najidsohue cajimanahitohui. Najarideni huapimapa coridsa imeni *azufre jororo cananihuaji hua todsippahitohui. Najaropi *dsoquehe dsotodecca –nade. (Nanidsapi najidsohue jiquejeranica tonahanamana-dsanapohuitohui.)

Jerosare dsati tahimarin

⁹Nadsapa Diocca dodosse tabaqqi memehuaajicca 7 quinaha tasaodsa najidsohue oppina tanicca cajiridsamanapojari ojaría ccajonadsa ohuadsa huati tajari: –Aji ticcajonaji, Edede Bedicca amoneje tojanijine najorajaro tia qqui onanana –nade.

¹⁰Nadsapi Dio Corimejine ima ohuadsa ahuaato tajaro. Pina occa huadassa nadsa qqui onajaro. Ocattoma cananeje Diocca dodosse ssono dequeranihuaji ohua tohuaccajari. Nanihuaji ohuadsa ahuaato inanajaro. Memehuaaji Dio pocca odsa panani bicabote Jerosare Dio Pohua tedsejema ccaronani qqui onade. ¹¹Najaro odsa pananipi

Dio pocca deni tojehe, pohua ssiejenejine dsibehi tajaro. Najaro dsibehinipi pina siba huatini ccara tanicca diamante dsibehinissa najaro. Ssaja tajaro pina cristaossa najaro. ¹²Odsa panani huapihuajipi siba hua nahuajanini dequerajaro. Motarema ccahuajanijaro. Noccobiji 12 nehe cajijaro. Najaro noccobijidsa Diocca dodosse tabaqqi ojari ojari naha huahueri naridsajari. Noccobijidsa onideni dsodo naridsajaropi jodiodenicca idi ojaría oni *Isaraeri bedi 12 quinajari onideni. ¹³Maji ccajonahihuajipi noccobiji 3 nehe cajijaro. Maji toccahihuaji naqui noccobiji 3 nehe cajijaro. Arobenihuaji naqui noccobiji 3 nehe cajijaro. Arobeni onihihuaji naqui noccobiji 3 nehe cajijaro. ¹⁴Odsa pananicca siba hua nahuajanijaro tocadacorate siba imeni 12 nehe cajijaro. Najaro siba 12 najarodsapi Edede Bedi Jeso pohua huatimadedeni 12 quinajari onideni dsodo naridsani qqí onade.

¹⁵Aja Diocca dodosse ohuadsa huati tajaripa nanattome orocca dsibehi tajaro dsojo inajari. Najarodsá odsa panani, noccobiji, hua nahuajanini naqui nattomede tojaridsajari. ¹⁶Nadsama odsa panani dequeranihuajipi pina bijini matanihuajissa caniquimera-jaro. Diocca dodosse odsa panani nattome inadsapi 2 mil, 200 kilometros (2,200) cajijaro. Dequeranihuaji najarossa, bijini matanihuaji najarossa, tetepihuaji najarossa caniquimerajaro. ¹⁷Nadsapi hua nahuajanini nattome inadsa sibanipi 65 metros. Najaro nanattomepi ajijaro nami nanattomedsa Diocca dodosse nattome inajaro.

¹⁸Odsa panani huapihuajicca hua nahuajanijaropi diamantedsa nahatojaro. Odsa pananipi oro poniradsa canahatojaro. Najaro oropi pina jojo ssaja tajari-ssa najaro, tocassiejequimera najaro. ¹⁹Aji odsa pananicca hua nahuajanijaro tocadacorate siba imeni 12 quinajarodsapi siba bedeni dsibehini bicabote nepi naridsajaro. Siba bedeni janonipi onihí onihí naridsajaro. Oninipi ajima najaro: Tahidecca siba imenidsapi diamante dsibehi tajaro ijiridsajaro. Dsotodeccadsapi sapiro sohue tajaro ijiridsajaro. Onihí 3'ccadsapi acata macconi janoni cajini ijiridsajaro. Onihí 4'ccadsapi esemeraoda sohueni ssaja tajaro ijiridsajaro. ²⁰Onihí 5'ccadsapi onise sohue tajaro noponidsa quejemajaro ijiridsajaro. 6'ccadsapi robi macco tajaro ijiridsajaro. 7'ccadsapi crisolito huesse tajaro ijiridsajaro. 8'ccadsapi berilo macconi, sohueni, huesseni ijiridsajaro. 9'ccadsapi topasio macco-cco najaro ijiridsajaro. 10'ccadsapi crisoprasa sohueni huesse tajaro ijiridsajaro. 11'ccadsapi jasinto sohueni ijiridsajaro. 12'ccadsapi amatista sohueni idira tajaro ijiridsajaro. ²¹Aji noccobiji 12 najaropi *perla noponi dsibehi tajaro 12 nehe huacossaridsajaro. Perla ojariepi noccobijidsa ojari ojari naridsajaro. Odsa pananicca jahui huapimapi dsibehini oro ponira ijijaro, tocassiejequimera najaro.

²²Najaro odsa pananidsapi *Diodsa dada toqquma odsa qqí onejerani. Dio Atti mamari naqui nohuerajaro. Naraha ia Medsede Dio Dacorabotena nahidsa madijari.

Edede Bedi Jeso naco nahidsa madijari. Iqueriquidsa etidsenijinepi pohuadeni pamahadsana ehetidse nanijine. ²³Diocca odsa panandisapa maji nohue, abadsico ssiejene nohuerahi. Ssiaja taridsajaropi Dio pocca deni tojehe, Pohua ssiejenena paji. Edede Bedi naco pina jojororossa najari, pohua ssiejene ssiaja taridsajari. ²⁴Aji dsama onihi onihi naridsajarocca madija huapimapa najaro odsa panani ssiajanidsa madimanahitohui. Dsama onihi onihipca taminedeni naco poccadeni biquehe deni tojanicca Diosda da quinanjine najaro odsa pananihuaji dsojo idsimamananitohui. ²⁵Noccobiji tohuabehe nema dsanaponitohui. Dsomepi nohuerani. Ssiaja ponira nema dsanaponitohui. ²⁶Dsama huapimacca madija poccadeni biquehe deni tojanicca Diosda da quinanitohui. Poccadeni dsamacca biquehe naqui da quinanitohui. ²⁷Najaro odsa pananihuajipi Dio jipera tahicca nohueranitohui. Madija imasiri totonanadenipa jahidsima-jarahitohui. Madija mamaisadedeni naco jahidsima-jarahitohui. Aja Edede Bedicca papeo *camittehe cajimana-dsanapohuijineccadsa onideni dsodo naridsajaridenira jahidsimahi ojarhitohui.

22 ¹Nadsapa Diocca dodosse hueni bicahi ohua qqui tonanajaripa passo ssahua tajaro, tocassiejequimera najaro. Najaropi passo camittehecca. Dio, *Edede Bedi pohuadeni pamahacca huihuittari cahittarinidsa passo qqenajaropi hueni tocajajari. ²Najari huenipa odsa pananicca jahui nocconi motta tohuaccajari.

Ahua camittehecca hueni inididsa ahuaaji hua, jippehuaji hua najari. Abadsico cajari cajari bobono najari. Huajano ojariadsa bono cajjaripa 12 najari. Najari ahua eppesa dsama huapimacca madija nomiqqiri naha madi-manad-sanapohuijine. ³Najaro odsa pananihuajipi tabaccorehe nohue, Diocca najidsohue naqui nohueranitohui. Nanidsapi Dio, Edede Bedi pohuadeni pamahacca huihuittari cahittarinanitohui. Diocca medse huapima pohuadeni pamahadsa huatidsemanahitohui, jiri jiri quiquinanahitohui. ⁴Dio Pohua assire qqui quinahitohui. Pohua oni pocca medse huapima assaridenidsa dsodo naridsanitohui. Najaro imapi Dio Pohua pocca toquejenajari. ⁵Nanidsapi dsome nohueranitohui. Nahihuaji madija madimanajaridenipa jojororo tohui, maji ssiejene tohui quina-jarahitohui. Ia Medsede Diona huapimadsa ssiaja inanaridsanitohui. Nadsapa Dio pocca medsedeni huapima dossede toquejena-dsanapohuitohui.

Jesocristo ccanipomahicca imapi huajira tani

⁶Nadsapa Diocca dodosse ohuadsa huati tapomajari: –Ajjaro imapi pajissa. Imapi pina ajjarossa nehe tojanitohui. Ia Medsede Diopa Pohua Atti cacomeraqqiri najaridenidsa Pohua Atti inanaridsapojaro. Najari Diopa ohua dosse naronajari. Ohuapi pocca dodosse, pocca medsedenidsa pohuadeni tedsejemacca ima tojabote nanicca ahuaato onananijine occaronajaro –nade ohuadsa.

⁷Ia Medsede Jeso attipa:
–Occanibote nani –najari.

—Diocca ima itedsejemacca ajijaro papeodsa dsodo nanidsa ibora tajaripa occa biquehe pohuadsa onananitohui —nade.

⁸Ohuapi Huano, aji jidapanacca, itedsejemacca Diojine huapima ohuadsa ahuato inanadsa omittajaro, qqui onajaro. Najaro jicadsapi Diocca dodosse ohuadsa huati huati tajari baccouhaji opitodsa ohuittajaro, pohuadsa ohuatidsenijine.

⁹Naraha pohua attipa: —Nema tejeraji. Ohuapi Diocca medse ojani. Pina tiassa, pina timecotedeni Dio Atti cacomeraqquri najaridenissa onajaro. Aja madija huapima ajijaro ima papeo dsodo nanidsa iboraqquri najaridenissa onehe Diocca medse ojani. Diodsara tetidseji —nade.

¹⁰Pohua atti onih naqui: —Diocca ima ajijaro papeodsa dsodo najaropi madija hua hua quinahijine ahuatoranidsa techua tejeraji. Ajijaro ima dsodo nanicca tojanijinepi huajira tani. ¹¹Najaro ima tohuajiradsapi madija tabaccora tajari, bodi oba tajari naco poccadeni tabaccorehe inamanaccanijine. Apaja, bodideni cacajiquimerahijine pajiramana-jarahi. Naraha madija bica tajari, bodi huire tajari naco ima bicani inanamana-dsanaponijine bica tani —nade Diocca dodosse ohuadsa.

¹²Ia Medse de Jeso attipa: —Jehe, occanibote nani. Ima bicani inanaridsa-manajarodenipa najarossa nehe pohuadenidsa da onaridsanitohui. Naraha ima tabaccora tanicca inanaridsa-manajarodenipa najarossa nehe pohuadenidsa da onaridsanitohui. ¹³Ohuapi ohua. Ajijaro dsama nahatopo-jeradsama

omadipojaro. Nidsa dsotode ajijaro dsama jicaraha ohuapi omadi-dsanaponitohui —nade Jeso.

¹⁴Nadsapa madija pina poccadeni etero ssahua quinajarossa nadsa bodideni tohuireridsadsapa Dio pocca biquehe pohuadenidsa inanaridsanitohui. Najaridenipa ahua bono camittehecca jipamanahi bica tahi. Diocca odsa pananicca noccobijidsa jai tojedsimahi naco bica tahi. ¹⁵Naraha aja madija Jesocristodsa pajissa quina-jarajarideni, dsoppineje doridsa disseraqquri najarideni, huananehedsa disseraqquri najarideni, ijinedeni ahuamanajarideni, siba nahatonidsa huahuatidsemana najarideni, maidsehedsa disseraqquri najarideni, pohua tesse mamaidsadedeni, najarideni huapimapa Diocca odsa pananidsa jai tojedsima-jarahitohui.

¹⁶—Ohuapi Jeso, otahimaridsa titiqueriquiridsamana najarodenidsa occa dodosse memehuaicca dosse onaronajari, najaro ima nemanehe timittamananijine —nade. —Ohuapi maittaccadsama Isaraeri potemahidenicca tamine *Dabi Potemahi ojani. Ohuapi pina dsidsidsamassacca abadsico bedi ssiaja tocanajarissa onajaro —nade Jeso.

¹⁷—Nija, ticcajonaji —quinahi Dio Corime, Edede Bedicca amoneje tadsajani. (Najaro amonejecca imapi Jesocristodsa ihiqueriqui najarocca ima.) Madija ajijaro ima mittamanajarideni naco: —Jehe, ticcajonaji —quinana. Passotohui bacco dsarijari dsede jipa tadsapa ccajonana, passo camittehecca manaconi jirehe dse nahijine.

¹⁸Diojine ahuatojaro itedsejemacca imapi ajijaro papeodsa dsodo

nani mittamanajaridenidsa ohuatti ajima onajaro: Madijapa ajijaro imadsa ima onihi inaharini oppina tani. Ima onihi tonaharidedsapa Dio pohuadsa ima oppina tanicca inassonarinitohui. Ajijaro papeodsa dsodo nanicca ima oppina tanicca pohuadsa tojanitohui. ¹⁹Nadsama madija ohuaha itedsejemacca ima ajijaro papeodsa dsodo nanicca mota inebodsapi manaco Dio pohuadsa ahua bono camittehecca eccocohuitohui. Odsa panani

Jerosare naqui pohuadsa eccocconitohui.

²⁰Ajijaro ima huapimapi Jeso-cristo huati tajaricca. Iadsa pohua attipa: –Pajissa, occaninjine huajira tani –nade.

Nadsapi ia etti: –Pajissa nema nana. Ia Medsede Jeso ticcaniji –inajaro.

²¹Ia Medsede Jesocristo tiadeni huapimadsa ima bicani inanana, onajaro. Pajissa nema nana. Epejeni.

